



宛丘先生文集卷第十



張耒文潛

古詩

晝睡

雨去天已秋暑歸日猶永聊為清晝眠度此亭午景
虫鳴籬落晚地僻鄰里靜起坐晚聞雞虛堂無俗聽
我非汲汲者失脚陷穽穽天道不吾欺茲焉遣朝暝

夜坐

萬籟聲久寂三更霜已寒老人袖手坐一氣中自存
自得此中趣不與兒曹論但有老孟光相對亦無言

夜思

江邊鷓鴣鳥栖我屋南樹夜深風霜寒呼鳴自相語
樹頭鴉翼動樹杪雁行度朦朧見江山一：翻飛去

即事二首

大明海底生先警我東牖老人雖未起曉境默相授
山前羣動寂暗樹語鷓鴣昏：橫水霧落：欹曉斗
厨人已束蘊汲井鳴盎在沽酒走家奴理食咨竈婦
悠：春復冬冉：昏還晝通塞付大鈞聊安此微陋

又

鶯塵屏繁務幽獨會夙心惟時孟春月微祿歸園林

下有采薇逕上有知時禽終日自嘯歌寂無鄰里音
冉：溪日下悠：山靄陰興闌下絕嶽新月出遙岑

晨起二首

仲春忽過半長養候已深晨興雨初霽近日矚平林
繁桃張麗錦好鳥鳴清琴膠枝有新子翹草無陳心
謫官傷局促端居厭滯淫眷言平生友乖隔如辰參

又

窮居無遠念暇日親庖厨澤國富滋味春江出嘉魚
鬻市有懸羔榭園得嘉蔬雖無五鼎烹薦俎頗有餘
導和資一杯徑使愁肺蕪條味以實氣聊以彊吾軀

聖賢戒求飽豐德任形耀彼昏勤勵智我獨懶求愚

夢游陳州柳湖覺而作

虎豹九閔未敢望里門舊游如可尋夢到城西古濠
水倚天高柳萬黃金叢祠之南我舊圃蔬甲若：春
泥深睡覺啼禽自相問經年他鄉何滯淫

早作

鷓鴣夜寒不得眠永夜相語高樹顛鴉鳴最早尤喧
闐啼呼相應動百千老雞睡起足攣拳側頭端如聞
九天引吭一唱鳴宮懸時或不後亦不先朦朧初日
見山川吾廬人起有炊煙

局中晝睡

烏啼花開千萬思春色醉人成午睡燒香掃地一室
間藜牀布枕平生事君知章華久寂寞楚夢無人憚
青兕東風靜野作晴雷蕩感山川作紅翠白日下照
七澤寬孤城樓觀失餘寒頗怪故山頻入夢年來真
厭楚人冷

晨興

喔：雞向晨風興鄰里靜朝光出東崗秋曉氣耿：
亭：脫葉樹寒意已踈勁草根有微露醲綠尚交映
老夫起默坐覽物感衰盛忽然遇杯酒酣歌朝達暝

朝日

朝日照山堂流光泛踈牖龍鍾病童子掃地起待帚
堂中空四壁惟一老病叟蕭條野僧閑鄙樸老農陋
雨來林葉響霜近蔬甲瘦何以遣幽憂賴有尊中酒

叙十五日事

五更聞鐘自驚起坐守殘燈具冠履昏：病眼正團
花獨愛當庭月如水彊驅睡味誰不仁漠：黑甜留
兩背忽驚左掖漲風埃已趁上閣鏘環珮平明原廟
煥金碧飢投敗幕食寒餌紛：僕：酸兩脛肉食當
然賤何事走馬還家百不同掃榻伸腰真有味起來

炊熟日亭午槐葉新成庭覆翠翻書弄翰老自笑飽
食安眠計難遂古來高士不入城肯聽鳴雞踏朝市

旦起

漫：東牖白開帷納神光欠伸推夜枕扣齒披朝裳
瓦盎汲石泉漱濯齒頰涼維茲孟夏初宿雨清高堂
樓鳥起且啁露翼鳴更藏悠：晚花殷落：古柳蒼
西舍初鳴春東鄰出求糧客馬已別櫪商車欲踰崗
羲和一揚輝羣動皆擾攘有生無不求誰得偃于牀
人生但如此勤苦亦何傷况我病倦翮飄：信風翔
永懷中林士栖志煙霞鄉願言寄旅跡栖託以徜徉

昨夜月中一睡殊有秋色覺書所見戲呈道
孚

幽人息遙夜四聽市聲寂月華清可掬天色紺欲滴
候虫先知秋微響出陰壁精熒高露濕斷續殘河白
興懷我自出抱器方待擇感時當有作陋巷奏金石
余方間農圃朝市嗟埽迹先寒戒裘褐歲暮養老客
不寐

荒庭雨多秋草侵秋蛩相語秋夜深草虫暗飛羽格
磔星河影高天淡白騷人多懷夜不眠老松微吟風
颯然山川浩蕩何日還晚空漫々白露寒

晨起有感

故歲如曉客行意不可留新春如美人含笑未舉頭
定知當粲然有待姑少留山川謀光景梅柳露風流
惟有堂中人一衲煖蒙頭榮枯不到心萬事良悠々

在告家居

朝日入寒屋春風已復來老子朝睡足悠然有好懷
冬溫抱微疾亦不禁酒盃悠々三酌後徑使牢愁開
惱我以貧賤我心如死灰誘我以富貴我視如塵埃
以此行世間何往願不諧呼奴具鱸脯蔬果粗安排
瓶中幸未燥不醉何歸哉

四月望日自孝悌坊遷冠蓋孫氏第

青蕪滿古城白日照大澤街荒雞犬閑市遠喧閑寂
中有騰：者淮陽四年客坐偷太倉粟穩睡而飽食
平生願陳力衰老困逼迫何曾一可意但有百無益
偷安淺夫志苟且志士惜窮通有天理誓不安苟得
朱陽方肇序春去無輟迹悵此復幾時撫事三歎息

臘月十八日蚤苦寒與家嬾飲

寒夜不可旦老雞鳴苦遲晨興出戶視風折山樹枝
最愛堂東梅冽寒亦弄姿夜來月中影窺我讀書惟
中庭石井欄晨汲氣如炊今日復何事環珮聯冰澌

麓巖有芳醇庖舍具鮮肥地爐熾薪炭三酌對山妻

余謫居齊安寓郡東佛舍而制不得逾歲今

冬遂遺居因遣柅桔料理新居作詩示之

孟冬寒氣至北風羣木衰微霜墮簷瓦老客卧先知
二年蕭寺客巾履忽復移誰令簡書畏易此鷓鴣枝
冥：造化中毫厘陰有司念此雖細事亦非人所為
東牕頗明爽洒掃吾遨嬉濁酒為余辦勿使歎空卮

自乾明移居柯山何氏第令柅桔先葺所居

吾居最易足容膝便有餘平生一畝宮游宦乘所圖
謫官求便文儼舍柯山隅洒掃勤汝力真成野人居

栖鴻媚夜渚待旦志在塗栖遲聊復尔本不計憂娛
惟此東窓下可以陳圖書三酌便陶然何者為吾廬
十月十二日夜務宿寄內

寒夜欺老人展轉睡不足長年怕為客况此空齋宿
噤：度雲雁瑟：受霜竹凍徹冷如植未覺重衾燠
天明起盥籜淡日初照屋寄聲家具酒買魚烹雁鶩
遷居羅漢潘邠老昆仲以此火驚相見殊闊

作詩調之

畢方逐未去里巷時在走念君簞歌外顏室空無有
誤憂黎元謾烜赫驚戶牖我雖厭遷次突寒黔已久

平生昧奇字安得君載酒

東園

堂中宴坐不妄出堂外青春去如失小園十步綠如
雲一時桃李事已畢猶殘醱醱數朶在未覺塵沙汙
玉質金沙格俗可中憐膩白嬌紅如欲滴老夫睡起
聽山禽竹間林外紛嘲嘖笋生漸愜子猷願梅熟未
邀朱老喫翻書只作引睡具傾壺屢進忘憂物今春
風雨稍依節上田麥穗過數尺但知洗眼看世塗莫
厭中年守蓬葦

東園

荒園何所有落葉與衰叢含芳未肯吐惟有木芙蓉
黃菊如佳人綠萼包金茸併隨重陽酒娛此憔悴翁

東園

浮雲蔽亭午白日成蕭森餘涼入坐隅蕭洒散煩襟
孟夏愛我屋秀木成佳陰衆果頗已成永日鳴山禽
杖履時一到道遠忘滯淫舉頭天雨霽落日低遙岑

獨游東園

清曉步東園獨游悵無侶菰蒲綠已深鵝戲春塘雨
取酒就花傾隔林邀客語歸來春興闌睡起日亭午

秋池

秋池

平生落寞意况此秋池側寒水靜無波衰荷委餘碧
蕭蕭動風鬢照影感新白來往雙浴鳥爾生真自得

步蔬圃

荒城繁草木落日下牛羊巍亭俯蔬圃秋物半青黃
最愛雄雞冠殷鮮如激昂黃葵貴且麗薄夜掩其房
低篁掩蟋蟀枯柀巢螳螂落中畦棗垂實半老蒼
深行亂飛蝶時亦掇芳香况復携婦子笑言何樂康
歸溪踏新月到家燈燭光田園興偶動踈懶意何長

霜後步西園

濃霜午煊妍短日淡無色回風振中園搖落聲策策
草根飢鳥啄飛舞時噴噴野荒無遺粒卒歲將何食
鮮西牆下幽草弄寒碧四時不吾欺聊假汝頃刻

初夏步園

夏木皆秀茂小園交茂林巢成雛欲出上下鳴時禽
中有支離翁行憇佳樹陰好風為我來蕭然散煩襟
物化日遷逝客居何滯滯齟齬行天有數隱顯我無心

雨夜懷陳永源山莊

陳君為生廉易足水石田園藏一曲畦田已作故侯
業種竹未享封君祿千名懶復觀書卷濟病時能開

藥籙夜來秋雨如決渠不寐憂君玉川屋

窺園

吾老懶讀書得閑常窺園愛此千樹雪高低不勝繁
衝風掠之去頗已隨沙塵感之可奈何我豈土木人
畏病不飲酒已慙嵇阮真淡泊非衆嗜自娛難及賓
獨游遠獨吟魚鳥與我親悠哉山林趣媿此簪纓身

暇日步西園感一物輒為一詩得六篇

醅醪

欲知此園古請視醅醪蒼孫枝已輪囷走蔓龍蛇長
春風一吹噓灼灼發奇光仙姝不可挹順風飲其香

秋圃

秋圃寂無有蕭條殘菊枝老蛩依日叫晴蝶傍人飛
鎖澁門開少莎長人到稀舊游人記得到處即如歸

菊叢

下根盤秋泥上葉披宿雨唯餘黃金蘂秀色日夜吐
寧須薦九日但惜歲云暮吾將屑落英持泛蘭皋露

芙蓉

清霜厲嚴殺松栢氣不振芙蓉乃微木曉艷獨嬌春
穠粹覺蘭疲芬敷知菊貧欲攀無所贈聊復揷吾巾

橘

奇材蘊真粹健葉園青鮮中有碧瑤實正味百果先
貢包登堯俎頌德列騷篇李衡空庸材徒列木奴千

斑竹

重瞳陟方時二妃蓋老人安肯泣路傍洒淚留叢筠
頗疑葛陂化點、留斑鱗慎勿脫水去人世多埃塵

種蔬

貧舍無旨蓄種蔬治寒蔬縱橫數席間灌溉亦勤劬
積雨有新甲時摘付中厨何勞樊遲學當問漢陰夫

宛丘先生文集卷第十

宛丘先生文集卷第十一

張耒 文潛

古詩

步下四望亭至東坡柳逕訪邠老不遇

北下四望嶺兩山中曠平縈紆蟠逕術迤靡分溝塍
林間樵汲路壟外牛羊鳴落景忽晚春淺泥聞耦畊
餘紅猶落：高綠或亭：柳間見衡門欹屋尚崢嶸
主人掩闥去春蕪空復青論文挈兒曹得句懷友生
安得輞川翁畫此一幅屏

休日同宋遐叔詣法雲遇李公擇黃魯直公

擇烹賜茗出高麗盤龍墨魯直出近作數詩
皆奇絕坐中懷無咎有作呈魯直遐叔

休日不造請出游賢友同城南上人者宴坐花雨中
金猊散香霧寶鐸韻天風鳥語演實相飯香悟真空
尚書二三客爭社繼雷宗黃子發錦囊句有造物功
握中一寸煤海外千年松誰降午睡魔賜茗屠團龍
晁子卧城西咫尺不可逢豈無坐中客終覺欠此公
歸帽見新月撲衫暮塵紅困眠有餘想却聽寺樓鐘

遊武昌

一葉橫江凌浩渺李君見我迎門笑
蘇黃初熟醅旋壓書室焚香地
新掃淋漓歌笑不知夜竹榻枕藉眠
諸少老人被暖覺獨晚驚起東南日如燒
四明陳子定愛客生火寒廳邀我到
盤肴香潔具俄頃鱸斫寒魚初出沼
仲謀霸氣久寂寞元子亭基尚危峭
荆榛荒梗上石磴人物清江開野廟
莫投明府快一飲主意慙慙賓屢醺
星河破碎歸中夜明日清淮理歸棹
王家園館靜人眼挂壁於菟疑欲嘯
殺雞為黍辦倉卒看園烹茶每醉飽
還家閉門空寂歷勝境目前皆了了
茲游可再誰汝嗇老懶似不能輕矯
西山得霜瘦如削蕭寺崢嶸出粉籜
幸余腰解猶足使與子凌

寒恣游眺

上巳日落岸獨游寄陳永寧

風雩感賢游嘉節偶乘興人稀好鳥語麥秀春野靜
澄波漾清浴游子渡明鏡南山夜來雨雲日淡相應
解鞍憩高柳覽物動新詠優游徒侶喜豐熟蔬果盛
官閑省文檄俗古少誼競乘間輒獨游茲焉樂吾性

游楚州天慶觀觀高道士琴棋

頽垣蒼：鎖喬木草滿荒庭不容足壞簷破壁秋雨
餘蛛網蕭：風滿屋黃衣道人出迎客野態生踈脫
拘束圍棋盡掃一堂空烹茶旋煮新泉熟彈琴對客

客卧聽悅耳冷：三四曲離騷幽怨松風悲流水潺
湲履霜哭日斜携手步空廊鳴鳩相呼竹間宿黃昏
門閉人語絕空殿幽：掩微燭我生資身最淡薄每
厭煩敲幸幽獨何當不踏市朝塵長伴高人種松菊

同魯直無咎游啓聖

西方金仙千歲身天上伐木役天人閻浮檀光照世
界作此無量勝妙因九龍寶地赤精宅涌出宮殿壓
風輪化人南來為守護震動六種走鬼神錦幪老人
常住世燕坐說法無冬春故人蕭公直塵土白蓮花
葉光如新妙道無邊世眼窄直心遍通人智貧可憐

張氏文集
端居樊宇宙幾見疑惑談偽真簷牙森：鐵鳳啄殿
顏眈：金獸蹲官冷何妨近香火時容勝絕洗埃塵
渡洛游三鄉書所見

重雲蔽南山遠見山雨白我行山之北便與雲雨隔
西風來如奔零亂雲物拆驅除信果決霧霈絕餘滴
收雷如歸師蹄轍度南磧羣峯湧地出掀蕩無留碧
暮投三鄉寺落日在東壁鍾鳴高閣晚野迥見歸翼
還家晚川靜秋月未生魄聊資覽物態應用慰行役

游白馬寺

秋林轉層崖步踏落葉響森：夾路竹蠹：羽林仗
精廬隱深塢門啓臺殿敞纍：霜果懸落：寒木壯
房深燈火暖縱飲頗酣暢山寒夜已深嶺白月微上
天明寺南去幽路隘而昉林分逕忽斷淺見澗逾丈
崩奔被澗石大小非一狀丸：列圉廩落：非甕盎
鳴泉走石罅聯絡弄清漲喧頽競飛漱冰瀉或平漾
羣行命朋儔因息植吾杖松見奇鼠石蟹侑朝餉
深行耳目靜擠險誰復讓寒聯老木陰暖值丹崖曠
秋暉墮平野暮鳥啼青嶂徜徉未知返欲去意先愴
膏梁與薇蕨美惡隨所尚當其兩自得厭滿絕餘望
乃知山林樂豈為隱者安况吾不事：枯槁理則當

違：施仁義此固聖賢量我自沮溺徒踈頑安可彊
獨游崇化寺題觀音院

默：苦不展駕言陟崇岡人遠塵盆息高門開寶坊
華簷敞虛殿喬木護脩廊閒庭隱幽步偃息得茲堂
惟時炎火衰清秋朝暮涼窓虛竹色靜風遠松聲長
遙山露雲表遠水連天光獨游不自得遐眺有餘傷
留滯感華歲登臨思故鄉言歸日已夕月出林蒼：

奉先寺

荒涼城南奉先寺後宮美人棺葬此角樓相望高起
墳草間柏下多石人秩卑焚骨不作塚青石浮圖當

丘壠家：墳上作亭亭朱門相向無人聲樹頭土泉
作人語月黑風悲鬼搖樹宮中養女作子孫年：犢
車來作主廢后陵園官道側家破無人掃陵域官家
歲給半千錢街頭買餅作寒食

宿鳳翅山懸泉寺

秋山晚景涼幽路轉石壁稍知步武峻漸與雞犬隔
層崖峙我西懸瀑垂百尺崩騰擣重泓晝夜碎珪璧
天寒行已深嶺轉客慙息最愛下山泉潺：馬啼側
重門敞幽寺臺殿互開闢野僧三四人披衣出迎客
陰：脩竹靜下有神龍宅泓澄一泓泉黯：萬古色

脩然改瞻視異物如不隔蕭々毛髮踈佇立動神魄
雲低秋天陰木落山日夕房寒燈火青夜久人語寂
通宵淡無夢起望曉天白山川接周韓清洛去不極
我無軒冕意野性自夙昔塵埃阻幽好犇走愧謀食
偷閑到丘壑便欲老泉石君有在籠鶴豈願潛六翮
將歸且復止既去緩吾策寄語山中人行當蠟雙屐

南山

南山鳳凰雙翅垂口不妄食腹苦飢山前老鳶飽腐
鼠憑恃風日羣游嬉俯身視鳳有驕色鳳不汝較空
嗟咨九韶一奉為君舉坐看百鳥相隨飛

洛水

洛水秋深碧如黛亂石縱橫瀉鳴瀨清明見底不留
塵日射澄沙動璣貝南山秋風已蕭瑟倒影上下迷
空翠何當載酒縱扁舟一尺鯉魚寒可鱸

病瘡登疊嶂樓

沉疴幸蕭散登覽慰無聊江南春尚早餘雪冒山椒
野梅臨風謝溪澌映日消晴林鳥聲樂幽塹水文搖
新年人意樂初霽物華饒共理慙良收無政載風謠

登雙溪閣

清溪浮天光北驚而西折羣山合沓來斷作青玉珞

中園萬家邑簫鼓樂芳節仲春卉木麗紅綠晚明滅
重樓壓城角高眺俯木末川雲斷還續谷鳥鳴復歇
興闌未能返留酌待芳月

淮陽

淮陽古帝墟鄙夫少所游最愛城西路槐榆拱高秋
城下古壕水時澄泓不流嗟哉始封君千古留一丘
西風曠新兔魚鱉亦易求穀穗如垂珠松林風颭
異鄉仍謫官一步九回頭何時守一廛白首事鉏耰

西山寒溪

一本云挈家同潘郎游寒溪西山
二寺并寄邠老詩中亦顏邠老書
也

茲行頗閑暇聊此山水間况有所携人臭味同一源
杉松開古刹始覺此溪寒孤亭出屋背石磴相牽攀
釋子具粗糲雖貧有餘歡午登西山去路作九曲灣
山禽慣不驚夏木秀且繁緬懷紫髯公奠玉祠天壇
豪彊有置韻興廢無留觀空岩一泓泉引余掬清甘
至人悲熱惱遺此消昏煩我茶非世間天上蒼月團
為爾惜不得烹啜澆晨飡深谷晚易陰清雨時班
但見夾道松龍蛇濕蒼顏念我亦顏人深居閉柴關
不使倒珠玉使我胷中慳之官亦漫浪遇勝即盤桓
平生據頑鈍信命傲憂患言歸途旅疲就蔭休征鞍

却視來時舟一葉繫荒灣

美哉

美哉洋：清潁尾西通天邑無千里舸舫大編起危
檣淮潁耕田返收米芒：波澤帶平原古時溝澗還
相連昔人屯田戍兵處今人阡陌連丘墓今年雨足
種麥多北風吹桑鳴空柯高城回望鬱嵯峩豐年間
井聞笙歌河邊古隄多老柳去馬來船一回首百年
去住不由人歲暮天寒聊飲酒

東池

東池秋水清歷：見沙石枯荷半倒折風起鳴撼：

悠：岸邊菊灼：好顏色芬芳人不知寂寞聊自得
寒蛩白日啼晚葉霜餘赤無人野竹繁積雨平橋側
噫：雲間鴻歲晚霰雪迫乘間輒獨游官閑幸無責

東溪

東溪何澗：秋水清見底縱橫小石圓一：靜無滓
空山人不到澗：響環珮我來每終日漱濯弄清泚
山居時已久不省有朝市門闌人客少跨馬必至此
麋鹿見我熟相對不復起誰知寂寥趣寄言同聲子

北原

秋風日夜吹北原北原秋蕪不復繁縈迂一逕漸可

躡步踏落葉披榛垣蕭：九月草木變獨有脩竹猶
禁寒青紅野實不可辨晚日照射霜榴殷嶮：女几
更清瘦崖壁刻削無雲煙潦收石出洛水好靜夜到
耳聲潺：原西古城有微路禾黍索：荒涼田人家
歲熟婦子樂村巷日暖牛羊閑登臨嗟我幸無事况
有美酒供開顏射麋獵兔可卒歲棄擲萬累休嗟歎

新開北原

山深草木多春夏廢剪剔北原有高溪經歲不躡履
陰根走重險飛蔓密如織交柯不容鳥老枿頑若石
由茲廢登眺幽致莽蕭瑟杖藜每獨往駐立為歎息

窮秋九月衰霜過萬葉赤北風始驅除蒙縈遭搏擊
乘時集我徒斤斧必謹飭攀緣窮剪伐上下恣搜剔
霜鉞落勁節巨斲剖堅植蛟龍脫鱗鬚犀兕遺骨革
薪蒸不足道椽棟固委積紛紜一日勞既暮岩藪剔
寒篁露幽翠佳木呈秀色高臺忽平敞快步失荆棘
嶮：女几峯次第見晴碧遙村暮煙合烏鳥寒寂歷
縱橫目前景指顧歸咫尺茲焉遂忘返漸可携尊席
人間有能事功效在勤力惡深當痛治穢盡善斯得
經年滯窮谷庶以娛朝夕題詩寄初終撫事心有激

山海

愚公移山寧不智精衛填海未必癡深谷為陵岸為
谷海水亦有揚塵時杞人憂天固可笑而不憂者安
從知聖言世界有成壞况此馬體之毫釐老人行世
頭已白見盡世間惟歎息俛眉袖手飽飯行那更從
人間通塞

春遊昌谷訪李長吉故居

連山忽中開研若敞雙戶清泉瀉中間行子並溪去
蒼崖左右壁田隴亦碁布渠流漲春漪鳴澗轉芳嶼
雞豚見茅屋負檐隱微路竹塢藹青蔥花岩被紅素
仲春雨新歛晴日破氛霧南山當其門列嶂儼環護

深行不知厭捨馬時獨步欣然耳目愜遂我麋鹿趣
朝隨浮雲來歸轡月中度惆悵錦囊生遺居無復處
宛丘先生文集卷第十一

宛丘先生文集卷第十二

張耒 文潛

古詩

白公詞

斯人不可見千古懷清風
猶想鸞鳳姿脩然山水中
空祠儼遺像過者為肅恭
同時富貴人泯滅知何窮
公昔得所遇慨然屢輒忠
一傷巧舌刀泯默類瘖聾
出處竟無禍卷舒距知踪
被獲空歎麟不制方為龍

上皇龕

升危躡石梯已覺毛骨異
玄龕列山腹六月霜雪至

佛臺磨青紅紺滑不留水魏：教天人蒼玉刻冠珮
老僧佛高崖上有昔人字國都已蕭瑟山澤隱遺事
西軒俯空濶晝夜納蒼翠卜築莫後時林中有餘地

石樓

清溪若奔虬八瓊束其頸犇騰去莫脫擺掣恣驍猛
嘈：載風霆萬鼓助其勁聲驅石崖動氣抱晴日冷
我來怯初登注視久乃定悠：山川闊寸目羅萬景
平生林野趣踈放謝鞭警會期山月出一嘯清夜永

上方

足躡青玉蹬躋攀不知勞回頭瞰木杪始覺所歷高
孤鳥去城汝犇溪深怒號白日當晝梁青雲送微颺
坐久神慮平微涼清骨毛但驚塵垢容俯仰近赤霄
古壁有遺字昔人嗟寂寥南風不知暑古木常蕭：

三龕

萬穴列岩壁三龕獨雄夸封山鑿其骨開像儼且呀
悲哉輕人功不計歲月賒像成竟何補國破荒蓬麻
悠：清伊水去：榮山斜晚渚栖暝鷗夕波戰餘霞
陵谷良未遷古今如轉車唯應千年鶴歸顧時咨嗟

小孤山

一峯枝水孤劍立古廟開簾雙臉紅水邊古木老龍

蟄山下水色磨青銅
我來扁舟望有禱萬頃春水青
溶、明神報我音加厚
嗟我薦獻愧不豐重游知復
在何日俯仰天地身飄蓬

應龍

海州胸山有龍潭人傳有龍

應龍未過風雲起
仰活泥沙數尺水
彼能坐致千里澤
可憐一掬何難致
時哉未遇可奈何
一掬雖微安敢易
誰能寄語潭中魚
相聚須臾莫相忘

女儿祠下

山邊白雲閑不掃
山下松花龍甲老
東風古柏吹暖香
廟前土馬荒春草
朝霞為裳水為珮
守廟千年老

龍在清風掃堂人暮還
山頭月出溪潺

自廬山迴過富池隔江遙
禱甘公祠求便風

至黃瀝酒而風轉日行二百里
明日風猶未

已又風勢徐緩不奔駛
可畏甘公蓋吳將甘

寧云

江邊古祠吳甘公
往來祭禱嚴且恭
我離匡山已經宿
舟挽不進篙工慵
沙邊朝服遙致禱
澆酒未竟天迴風
一帆百里止還作
不徐不疾來雍容
我生已久甘困滯
神亦何事哀衰窮
但疑神理與人異
意誠詞直無不通
林皇夜泊若平地
疑有鬼物驅蛟龍
天明

張氏文集
旗脚向北指舟子笑語開船蓬

題焦山

元符庚辰未嘗男相率潘仲達同游匡山六月望日齊安罷官步登客舟過樊口李文叔棹小舸相送遂下巴河上靈岩寺：有河與狼石記云昔孫仲謀伐壽春於此祀天祭江刑白馬故山鳴馬寺有法堂頗華敞因與潘李飲酒賦詩其中明日至蘄陽登梁昭明太子廟遂宿且禱順濟乃發候風林皇港見江中黑物類獺又有尾鬣相馳逐久之激水高數尺風定而去過道士磯石壁色正青挿

水中又十里所過五兩磯遂泊富池禱甘公祠晨發富池望匡山諸峯半皆在雲中晡時至潯陽捨舟登陸晚宿太平觀冷翠亭時十八日也十九日過柳志完晚大雨將醮雨霽中夕醮罷復雨觀人異之二十日遊東林觀神運殿禮遠公像見晉安帝輦游磨院遂登白公草堂讀歐陽文忠公題名上五杉閣而歸晚浩西林歸納涼神運之南望香爐天池化城二十一日出山此其大畧其詳屬潘郎潤色

焦山如伏龜萬古浸碧浪舉頭北顧海尾負金刹壯

俄開城東樓秀色日相向松杉數毛髮人物見下上
欲携浮丘公掾散恣潛漾仙風如見引金闕或可訪
題廬阜官廳壁

平生山水興今夜宿東林落日樓殿影西風鐘梵音
雲橫山閣迥雨過虎溪深脚力猶堪在它年當重尋
題陸羽祠堂兼寄李援：亦有詩殊佳

陸子不可招寂寥風月魂空堂掩遺像幸此配老禪
舉世澆薄人云誰知子賢竟陵樵牧地陳迹豈復存
我欲歌子詩三歎拊無絃瓦登薦秋菊酌此石井泉
清詩弔陸子味若堂下泉陸子骨已朽青松代之言

松亦安能言風至時蕭然至談非牙舌陸子意已傳

漫浪翁

劉壯輿年過壯久不仕嗜學著書自名漫浪翁所
居之園林堂室皆以是名之求予為詩因寄之

堂有書萬卷園有竹千竿逍遙于其間漫浪追昔賢
乃祖首陽人疾世餓空山堂：秘書公赤手犯鯨鱣
後來得吾子門戶真有傳已信懷道貴預知行世艱
婆婆欲頭白不肯彈其冠我頃未見之千里知肺肝
不惜委珠玉投我書數編我窮安放逐老去頗知田
君獨胡取之學問考淵源江鄉歲已晏幽獨抱惰：

何當一盃酒與子相周旋

宿譙東逆旅夜聞歌白公琵琶行道人歡者
元和才子悲流落一聽琵琶謂天樂青衫裛淚作長
歌誰敢篇章和宮角譙東夜久行人稀卧聞此歌
者誰歌似舊時人不見舉頭欲聽淚雙垂畫堂青鎖
春無事幾聽此歌還幾醉東風桃李作黃埃寶篋塵
昏譜閑字一聲一聽一情傷未老應知幾斷腸轉展
曲終燈燼落荒殘寒月夜飛霜

題江州琵琶亭

危亭古榜名琵琶尚有楓林連荻花嗚呼司馬則已

矣行人往來皆嘆嗟司馬風流映千古當日歌詞傳
樂府江山寂寞三百年尋陽風月知誰主我今單舸
犯江潭往來畧已遍東南可憐千里傷春眼不待琵
琶淚滿衫

題安州張全翁大夫溪園

清溪縈為流碧玉散入綠岡萬竿竹照春四合錦繡
林干雲直上風霜木主人吾宗行珪璧解組歸來鬢
猶綠祗知林下酒盈樽不憂門外車推轂靈心內守
清水炭洗眼旁觀看榮辱造物乘除真有理却將康
健還無欲嗟予放浪已半世斥逐不去緣微祿六年

孫少卿文集
一夢百憂患踏雨褰裳過林麓殺雞為黍回得我
自犇忙不皇宿乃知風月為君好頗覺禽魚憎我俗
楚魚楚稻旋如土老去容身一茅屋他年杖履請卜
鄰與君靜話烹梁粥

題大蘓淨居寺

平生愛山如好德未嘗一飯忘泉石大蘓山下松柏
林路盡重門照金碧思公得道人所相指示岩幽駐
餅錫天台妙教源欲啓來此一酌曹溪滴兩公道場
為龍象兵火暫晦終暉赫撞鐘伐鼓食千指皆二大
士之餘力縈迂石磴造山頂上有至人方燕寂北軒

三伏飛冰雪一日掠盡淮山色東游塵土我實倦道
遇化城聊暫息青鞵布鞵舊家風此身終效名山役

踵息齋

物之有知者恃息物之有息知為賊天長地久載元
氣天地無心故無極君知一身誰主持六塵緣影工
伎兒發生變幻不暫止令汝鼻息無停時喘呼呀呷
生至死去本已遠何由歸真人嗒喪吾喪吾能使炎
火為寒灰中空無宰氣不使內自升降如靈龜深之
又深乃至踵根深蒂固凝不動超然內外無死地繁
棗華實龍虎用真人示我尺素書萬卷丹經不勞誦

他年綠髮對銅狄却視吾齋真化夢

劉壯輿是：堂詩 并序

子劉子創堂於官舍名之曰是：而求予為詩予復之曰夫物生之所必有而其為物彼是相次而不能定夫一者天下之是非也雖聖人出無如之何昔楚人有莊周者多言而善辯患夫彼是之無窮而物論之不齊也而託之于天籟其言曰吹萬不同而使其自己也周之為此言自以為至矣而周固自未離夫萬之一也而曷足以為是非之定哉雖然如周者亦畧稅駕矣劉子乃構堂揭榜而

獨以是：非：自任吾將見子物槩氣殫而言語之戰未已也嘗試為子歌堂之中樂而息子之勞度幾隱几而嗒然者乎歌曰

讀堂中之書兮以致子之眠飲堂中之酒兮以休予之言是非雜然於子之耳兮付庭中之噪蚓與夫木上之鳴蟬度幾養生而保和窮子之年

題韓幹馬圖

頭如翔鸞月頰光背如安輿鳧臆方心知不載田舍郎猶帶開元天子紅袍香韓幹寫時國無事綠樹陰低春晝長兩髯執轡儼在傍如瞻馳道黃屋張北風

揚塵燕賊狂廐中萬馬歸范陽天子乘驟蜀山路滿
川首肯為誰芳

麀猿圖

陰岩萬古無纖塵木石翠潤無冬春時哉兩猿掛復
蹲其一抱子為屈伸下有游狙意甚馴雄雌嬉游循
水濱沐猴遇麀愕欲奔據高自得俯而捫懸之門堂
恍疑真妙哉易生必有神以此成名以終身

蕭朝散惠石本韓幹馬圖馬亡後足

世人怪韓生畫馬身苦肥幹寧忍不畫驥骨當時廐
馬君未知開元太平國無事戰馬卷甲飽不騎玉關

索駝通萬里長安第宅連諸姨笙歌錦繡遍一國六
龍長閑空食粟霜甜秋草沙苑游日暖春波渭川浩
睢圓腰穩日生光乾豐膺毛帖肉珠鞍玉鞵驕不
行豈有塵埃侵四足韓生丹青寫天廐磊落萬龍無
一瘦豈知車下骨如墻飢齧草根刺傷口君家古圖
才半身千里騰驥已有神迴身側顧不無意剪駿絡
頭嗟失真君不見太宗戰馬拳腹毛身騎此馬縛羣
豪龍虎精神金鼓氣豈有閑地供指膏至今畫圖快
曾憶想見虬鬚親破賊那知但愛廐中肥漁陽筋脚
蹄如石神駒入水隨煙雲蜀山石路無行人六驥悲

鳴足流血騎驟遺事一酸辛

題吳熙老風雲圖

雨脚橫空萬牛弩烈風吹山：欲仆草披木拔何足
道大江翻瀾失洲渚路傍失轡者誰子道阻且長泥
沒履鞭驢挽車亦何急目眩心搖行不顧我生飄蓬
慣羈旅顧爾艱難亦屢逢衲被蒙頭不下堂且與身
謀安隱處

掛虎圖于寢壁示秭程

畫工出幻事縞素發原藪蕭：白茅低凜：北風走
眈然老於菟舉步安不驟日光炯雙射怒吻呀欲受

彼彪擲其旁文彩淡初就雖然竊形似已足走百獸
煩君衛吾寢振此蓬華陋坐令盜肉鼠不敢窺白晝

昭陵六馬唐文皇戰馬也琢石象之立昭陵

前客持石本示予者為賦之

天將剗隋亂帝遣六龍來森然風雲姿颯爽毛骨開
飈馳不及視山立儼莫回長鳴視八表擾：萬駕駘
秦王龍鳳姿魚鳥不足摧腰間大白羽中物如風雷
區：數監子縛取如提孩手持掃天帚六合無塵埃
艱難濟大業一：非常材惟時六驥足績與英衛陪
功成鏘八鸞玉輅行天街荒涼昭陵闕古石埋蒼苔

題壁

命駕欲詣客欲去復遲：事幸無甚急何用勞驅馳
家貧幸有酒亦畧具鮮肥且復東窓下高歌醉而嬉

次韻題李援舫子

李援武昌尉援有詩題船門用其韻

紫髯不復見故宮無入門元子亦寂寞一丘吊遺魂
興亡兩夢幻今古一朝昏念當置是事盡此舟中樽

寄題胡戡秀才琬琰堂

幽人築淇澳不與世相聞獨携千卷書過于骨肉親
辛苦作室堂挿架如魚鱗時：體不住一過千載人
山川兵火後墟廟金石存消磨餘紙墨幻滅去無痕

功名但如此知子道可尊不遺世一毫以全與其身
包醜傳黛膏百態售笑顰誰能雙蛾眉閉戶自貴珍
鄙人有夙尚願與幽侶敦他年抱健犢聽嘯入蘓門

宛丘先生文集卷第十二

宛丘先生文集卷第十三

張耒 文潛

古詩

讀戚公恕進卷

世方尚纖柔子獨不可揉人皆喜歎：子語不出口
屹然即之高俗子競嘲詬我嘗要之難快使暴其有
乃知謗之非更覺所得厚由來難小知此固可大受
讀書常辛勤世務飽經構琅：滿編文一：可推究
俗儒昧事實文字工綵繡可觀不可用章甫冠土偶
子能獨不然渾樸謝雕鏤寧為目前玩功見施設後

知心古所難形兀實見售嗟君聽者寡風雨但孤雛
又思理難常功業亦邂逅豈令匠石斤常縮袖間手
無為扣角歌且進滿尊酌但非遽可合有所待而偶
干將伏黃土氣乃在牛斗願君久自要蔽抑寧復久
與友人論文因以詩投之

我雖不知文嘗聞于達者文以意為車意以文為馬
理強意乃勝氣盛文如駕理維當即止妄說即虛假
氣如決江河勢順乃傾瀉文莫如六經此道亦不捨
但于文最高窺不見隙罅故令後世儒其能及者寡
文章古亦衆其道則一也譬如張衆樂要之以歸雅

區：為對偶此格最污下求之古無有欲學固未暇
君為時俊髦我老安苟且聊獻師所傳無以吾言野

讀管子

夷吾相桓公豈復偶際會觀其平生心身已有所委
天方困生民帛伐實在已求居寓所欲糾與白等耳
堂：東海邦內政謹疆理南荆北達燕玉幣走千里
仲尼免左社自以身受賜孟軻聖之偶非薄良有謂
彼狂後世儒詆毀恣輕議嗟哉不量分詎解聖賢意
區：彼商鞅操術良非是為法昧所從以身受其弊

讀杜集

風雅不復興後來誰可救陵遲教百歲天地實生甫
假之虹與霓照耀蟠肺腑奪其富貴樂激使事言語
遂令困飢寒食糲衣掛縷幽憂憤怒字：倒牛虎
嘲訶破萬家摧拉誰得禦又如滔天水決洩得神禹
他人守一巧為豆不能簠君獨備飛奔捷蹄兼駭羽
飄萍竟終老到死尚為旅高才遭委棄誰不怨且怒
君乎獨此忘所惜唐遺緒悲嗟痛禍亂欲取彛倫叙
天資自忠義豈媚後人覩艱難得一職言事竟齟齬
此心耿可見誰肯浪自苦鄙哉淺丈夫夸已訕其主
文章不知道安得擅今古光焰萬丈長猶能伏韓愈

石曼卿三佛名大字

石公神仙在脫落隱詩酒餘情到翰墨落筆聞宇宙
崢嶸龜山殿風雨梁棟舊煌煌：三佛榜鐵柱貫金紐
開張宮室正渾實山岳厚井水駭龍吟螳封觀驥驟
欲知含毫初一醮盡數斗墨池醴作筆神運不知手
從容解牛際蕭散善刀後古來精絕藝所貴神氣守
嗚呼渦水側爽氣一培塿微工付浩劫念此終銷朽
乾坤一大幻妄計金石壽惟有龕中人吾生茲稽首

卧病讀韋蘄州詩呈無咎

閑官無吏課未午省中歸端居屬微疾偃卧度秋輝

張翥集
書帙紛几席減教亦清羸庭花敗風雨晚蝶弄餘姿
懷公天津語夢起江湖思高秋挾捷櫓一與水神嬉
上去觸牆闖奮飛有繫維令人慙解肉消盡定何為
喜寶積智軫道人惠書偈

南山老禪翁白淨如水月我初獲親近解此癡腦結
十年歸故里父老半存減逢師百如舊才若旦夜別
故知靜能久豈有火中鐵致身煩熱外與世作冰雪
窮秋長安巷客子送書札龍蛙不同趣掬海救其渴
平生笑謀食中路願頗奪猶如伏轅鹿野性終跳踔
觸塗惟欲睡過眼時一噦摩尼本無瑕塵垢終異路

讀李太白感興擬作二首

瑤姬上帝子天日與晶光萬古巫山中玉顏照秋江
世界一培塿誰知楚襄王宋生底虫蛆妄以已意量
我無世上心乃游不死鄉與尔等愛惡朽枯終一藏

又

陳王本無賴少與美人期蛾眉作穢血蠱鬼尚何知
乃復結綢繆佇車心傷悲幻滅猶欲取哀哉一癡兒
千年化異物雙作鴛鴦飛終然隨大化飄蕩今何之

讀中興頌碑

玉環妖血無人掃漁陽馬厭長安草潼關戰骨高於

山萬里君王蜀中老金戈鐵馬從西來郭公凜：英
雄才舉旗為風偃為雨洒掃九廟無塵埃元功高名
誰與紀風雅不繼騷人死水部膏中星斗文太師筆
下蛟龍字天遣二字傳將來高山十丈磨蒼崖誰持
此碑入我室使我一見昏眸開百年廢興增歎慨當
年數子今安在君不見荒涼涪水棄不收時有游人
打碑賣

自淮陰被命守宣城復過楚雨中道孚因過
同誦楚詞為書此詩以足楚詞

秋庭新過雨佳菊獨秀先含芳良未展風氣已清妍

金鳳汝妾婢紅紫徒相鮮老人對節物昏：祗欲眠
與子讀楚詞疊：忽盡編媠：兮秋風慘慄在遠行
蟋蟀鳴西堂淹留了無成

讀唐書二首

隋文方混一自謂垂無疆安知房之喬拱立待其亡
哲人妙觀世俗慮固不長我知蒲柳衰寧待遘風霜
奇姿終英發起驂龍鳳翔魏：正觀績千載配虞唐

又

二張挾孽寵聲勢各滔天蛇鼠依城社自謂終千年
天道惡滿盈五龍忽騰騫斷頭誰救汝猴豚尸道邊

擊狗不擊首及噬理必然智勇忽迷方脫匣授龍泉
區、薛季昶先事僅能言留禍啓臨淄敗謀豈非天

讀守道詩

仁宗之初公有聲一世儒者聞之驚力行古義不顧
俗師事孫子傳其經掃堂捧杖供賤役侍師之坐隨
師行質疑問道無敢變當世始知師與生作為文章
不徒發譏切時事排公卿俗儒毀譽無所出乃取過
行為譏評過于仁義罪固小矯獎自合違中行人皆
不及子獨過、者之罪為輕開編偶誦子詩句誰辭
氣磊落嚴以清吟哦令我不能捨想見眉宇寒崢嶸

高風一泯不可見安得壯士能經營惜哉朽骨不可
作徂徠廢土知誰耕

讀李澄碑

自唐中微北方沸胡馬長鳴飲清渭李公守節陷賊
庭身死鬪骸行萬里百年事往誰復省一丘榛莽無
人祭荒碑半折^就磨滅後人空解傳其字殺身不畏真
丈夫自古時危知烈士俗書小技何足道嗟我但欲
揚其事寥、獲麟數千載末學褒貶多非是高文大
筆誰復作紕臣餓夫須有待紛、後世競著述紙墨
徒為史官費却嗟何獨此事然搔首碑前空嘆慨

聽客話澶淵事

憶昔胡來動河朔渡河飲馬吹胡角澶淵城下冰載
車邊風蕭々千里餘城上黃旗坐真主夜遣六丁張
猛弩雷驚電發一矢飛橫射胡首貫車柱犬羊無蹤
大漠空歸來封禪告成功自是乾坤扶聖主可能功
業盡萊公

偶書三首

秋陰漫々幾千里赤壁磯前天接水連檣接柂不復
行老魚擘波時出戲黃橙紫栗收如積青錢買酒不
堪惜北人歲久厭南食山邊有路何時還

窮秋晝夜陰如一夜不見星朝澈日枯疇已獲大野
空怒江未落連洲沒長魚撥刺不受鈎渙子高眠守
蓬華紫髯舊宮誰復游時時雄心久蕭瑟
周郎戰處滄江回魚龍蕩瀟山石摧荊州艤艫莫舉
檝走君不勞一炬灰當年雄豪誰復在喬木荒煙忽
千載蘄州截竹作笛材一寫山川萬古哀

馬周

馬周末遇蚪鬚公布衣落魄來新豐一樽獨酌豈無
意俗子不解知英雄賢豪相逢自相得一語君王見
胷臆當時豈不為人言聾耳安能為君側

睡起效韋蘓州

睡足起無事開扁步中園中國復何有花草藹已繁
飛紅被行路山鳥時一喧時雨副耕稼農事起郊原
仰欣天時好俯驚歲月奔自怜栖遲者守寂淡亡言

飲酒擬柳子厚

澤國多水氣日西春尚寒窮居無樂事且復開清樽
一酌召和氣三觴失愁顏百憂如奔雲天地為我寬
采：田中杞愈食仍甘食登盤自有味何必盛炮燔
效二謝體

棄斥非高隱林居值晚秋風雲日慘變感彼歲月遒

秀蔓依簷槁陳葉當窓投晚花弄餘秀畦菜枝新柔
閑居妙觀物貧賤吾何憂寂念師竺瞿齊物信蒙周

白樂天有渭上雨中獨酌十餘首傲淵明余

寓宛丘居多暇日時屢秋雨傲白之作得三

章云

寒極則有暑晦久則有明開闢迄今茲此理信可憑
炎：者易滅魏：者必傾聖智無奈何况此昏愚氓
設機以獵獸切骨陷其膺重勢以鎮物懸絕壓其肱
縱使資與育力有不獲呈物情千萬變可盡得經營
不如寂寞士葛帶而蘭纓無求復無憂容貌甚和平

况茲積雨餘秋氣日淒清悠然有佳興美酒時一傾

又

罷官卧窮巷值此雲物秋連延經旬雨城市欲行舟
柱礎變均塘瓦溝成暴流蕭然殘暑退寒事戒衣裘
老人朝睡足起坐梳白頭呼童飭晨食薪濕爨婦愁
洗我朱提杯不復具有羞一觴已徑醉萬事良悠々

又

故人遺我酒氣味芳以清置之屋壁間興至時一傾
銀杯度一合三醕已徹觥既免戒沉酒且無憂病醒
嵇阮愧令德劉石無遐齡荒狂有何樂徒以酒自名

吾幸免因此庶幾盡平生

古意效東野二首

與君雖異坊秋涼各平分已遣月入牖更教風掃門
照君幌中寢拂君堂上塵綢繆似衣帶終日遶君身

又

扇不風自涼身不蘭自香深居不出闕幽獨更清揚
為鵲栖君樹為燕巢君堂不食亦可飽况乃餐輝光

小雨效韋體

午景蔽浮雲芳林散清雨虛窓度遙吹稍覺書葉舉
殘疎知夏餘隕葉兆秋序幽獨無往來烹茶誰晤語

福昌秋日效張文昌二首

秋野無人秋日白禾黍登場風索索
豆田黃時霜已多
桑虫食葉留空柯
小蝶翩
晚花紫野鷄啄粟
警人起洛陽西原君莫行秋光處
傷人情

黃桑蕭蕭
秋水清田中日午村雞鳴
塲頭九月禾黍熟
空原雉飛飽新穀
棘籬虫鳴村路曲
道邊古坟生野菊
人稀田濶草茫茫
洛陽秋深能斷腸

權勢

權勢世所重桓温役孟嘉桓公自人雄
為下未足嗟
頗怪蔡中郎為董受玼瑕
因之以取死曾不念漢家

士固感知已尚安知
其它搜牢則可誅
好邕自其佳

臨文

一病廢百嗜好
文心未忘南窓納
虛明羅列陳繡紉
茫昧考策燧典章
斷虞唐清妍進屈景
雋永旌蕪張少狂
不自料遇事形文章
誤逢作者歎因復
力披攘蹉跎生白髮
始紉石室藏粗見漢
家事濡毫時否臧
文詞比工祝不殊
公卿行何用疲心精
舍本棄耕桑讀賦意
凌雲律令尊張湯榮
華繁過合才技無短
長頗師老氏術抱朴
和其光無營以卒歲
刻意翰墨場

宛丘先生文集卷第十三

宛丘先生文集卷第十四

張耒 文潛

古詩

次韻淵明飲酒詩

鄙性嗜酒親友所知也紹聖丙子得官明道寓居
宛丘職閑無事終日杜門人知其好飲也或饋之
酒不問寒暑日輒教酌飲雖不多而樂則有餘因
讀淵明飲酒詩竊愛其文詞而慕其放達因次其
韻嗟余與淵明神交于千載之上者豈敢論詩哉
直好飲者庶幾耳得詩一十九首

我欲常飲酒俗事苦奪之飲酒不得醉何如未飲時
顛倒衆譏笑佳處正在茲念此雖杜門濁醪日常持

又

出門憚應接俗士多不情對酒輒拜辭好禮以求名
嗟：名幾何曷足善尔生共處一泡中倏忽風濤驚
好飲信無補不飲亦何成

我久喜文辭思與鴻鵠飛老來覺非是念昔正可悲
買金鑄杜康百拜誓歸依晉陶與康伯九原吾與歸
涉世苦不諧多病身早衰唯有尊中君不與我心違

又

處樂非縱情處靜非避喧豪夸與枯槁彼各據一偏
悠然獨樂處在我不在山羲皇迹已遠三酌呼可還
一尊每獨睡不待賓客言

所嗜人不得一物百非是猶有尊中酒道勝無敢毀
彼哉譏謗者誑口而信耳當復十八隔罰此謬綺語

又

自庇無一椽道人分半宅屋西羅古磧寒草無人迹
纍：長與少豈復待年百鷓飛朝樹疎虫弔宵月白
平生或不飲至此方知惜

曹參漢賢相掾吏亦豪英四海付醇酒乃真知物情

張文正公集
亾秦餘毒烈一洗百壺傾和氣薰醉人金革乃不鳴
卑：談治道陋矣洛陽生

種樹東簷下雨來發幽姿微陽動九地光彩變新枝
榮衰一以異枯槁易神奇消息天使然人功徒爾為
杜門沽酒飲高縣吾馬羈

里有好事者我往尊輒開我亦為之盡每往亦開懷
尚慮數見厭動作旬月乖今晨起苦晚獨坐見烏栖
冬溫雪作雨里卷苦多泥且復閉門坐開卷理多諧
誰知無言中獨性不自迷得意復終日弭車不復回

又

弱歲慕世名中年頗探道世間非無苦病死與生老
相尋無窮已遞代作榮槁奇哉竺乾書百遍讀愈好
汙泥雖云濁本不害吾寶酒雖破淨律吾事在律表

又

昔嘗罹厄疾一卧輒踰時念無所歸咎乃誓與酒辭
那知偶不死持杯復飲茲既飲輒為盡快哉復何疑
神暢病自去此說信不欺藥石傷天和此方吾笑之

又

世間有醉鄉百世本一境欲游不待駕但畏足疾醒
其鄉無限界亦不阻巖嶺陰陽無疾癘風俗盡箕頽

君往余請從無待宵燭炳

酒盡輒起沾耽然待酒至呼兒挈樽杓未酌兀已醉
譬如念醯醢流液不待味醉客失揖讓醉語少倫次
坐客皆搖頭知稀故我貴

兒童居宛丘里巷昔所經重来三十年落魄竟何成
扣門問長老主人多已更蕭々城南道松栢共墳庭
念此久興嘆游不待雞鳴悠然且飲酒聊以慰平生

又

歲晏霰雪集客庭號北風老人不復出兀睡小齋中
忽然身且老惜此歲時窮一弛不再張吾身如挂弓

又

淵明酒不足種秫猶可得無秫酒須求時人嘲我惑
寧當且醉酣慎勿疑通塞但憎獨醒人豈有禁酒國
酩酊忘對言滿引常默々

樂天好飲者少亦登貴仕八年潯陽謫學道乃忘已
與時雖寡怨行已終有恥抗言立朝廷放志傲閭里
優游禍福間出處皆可紀乘流與偕逝遇坎輒復止
酣歌盡百年天理端可恃

吾知李太白蕭洒本天真一飲三百杯不問滴與醇
子雲亦好飲白髮事以新奇窮易拔閤區々賦劇秦

兩賢竟誰樂千載同埃塵

平生自百懶而獨于酒動生事萬緣疎而獨于酒親
皇：東家丘隱者笑知津我欲去即去柴車不勞巾
但飲百年中不愧飲酒人

大風與楊念三飲次作此贈楊

北風黃雲卷飛沙吹暗長安百萬家
煨爐對酒慎勿出且看酒面生浮花
為我吟詩說雲夢荆江洞庭方
汹涌吟成飲君三百杯莫學雪中驢
上聲酸哀

寄曼叔求酒

孫端明

青衫畿丞頽不羞二十持板拜督郵
歸來無物與消

愁典衣沽酒寒無裘囊空酒貴不可得
縮手愁坐凝雙眸秋風破屋冷颼：夜長不眠吟掉頭
豈無鄰家酒可偷簡書縛汝如窮囚
淮陽冬醪滑勝油脣焦不飲已經秋
汲公直聲聞九州小子昔也從公游
憫憐憔悴賜顏色時丐餘酌濡其喉
軍厨嗟我糟作丘萬甕沸響玉蟻浮
轍魚所願斗水游不敢多取煩陽戾
玉餅未至涎已流想見漱灑盈金甌
歌成咸書還自淋一醉猶須越境謀

余官竟陵時李文舉嘗以事至郡同游西禪
刹陸子泉烹茶酌酒甚歡也今歲余移官齊

安文舉自武昌渡江過我與之飲酒西禪舊
事慨然感懷

此生放蕩隨羣動一覺竟陵瀟灑夢江山喚我此中
來却愁風月無人共李侯年少能思我亂江兩葉歸
潮送不辭酒薄與君飲坐覺西山夕煙重西禪舊游
已陳迹壁間陸子塵生供石欄古井誰知味只有松
風自成弄愛君為吏無俗韻快誦離騷飲仍痛不嫌
寂寞過我來古縣年豐少爭訟

何斯舉惠酒

孟夏飲燒酒窮居莫致之叩門聞好語出應自披衣

雙榼儼在門使者前致詞歛衽受嘉貺敬此旨且時
且喜尊不燥安得計淳漓但恐昧奇字令人愧鷓夷

對酒奉懷無咎

城門失火池魚窮樹頭風聲酒榼空雖貧家婦有旨
畜一豕可口不待豈往來曳杖兩足健醉後哦詩雙
頰紅最憶南都晁別駕高歌大笑聲如鐘
我兄改秩令新昌相望雖遠同江外君家兄弟數如
我曹南好在厖眉弟官微無利沾骨肉兩處强健差
自慰近來老子還破禪一女咿啞猶未晬

醉郡圃三首

東風荒園開百花繁紅。白如晴霞。主人慙慙勸客
飲。我為滿醕。醉以華游。人酒客興未足。舉首白日西
南斜。人生有酒不肯飲。百年醒坐何為耶。
堂：春日躍山出川原。草木皆清新。千紅萬紫各有
態。正自酬酢勞精神。短籬誰家小桃李。雖復幽陋亦
可人。但知痛飲莫知病。數年幽憂難具陳。
驅童晨摘承露花。薦以玉盤濡井華。誰云籬本即憔悴。
持玩入手意有加。為之致酒就几案。影落酒底杯
浮葩。平生看花常不足。肯使容易親塵沙。

文周翰邀至王才元園飲

朝衫衝曉塵。歸帽障夕陽。日月馬上過。詩書篋中藏。
心疑長安人。一：如我忙。城西有佳友。延我步閑坊。
入門見主人。謝客無簪裳。蒲團烏皮几。密室留妙香。
門前佳木陰。堂后羅衆芳。飯客炊雕胡。旨酒來上方。
盈：雙鬟女。身小未及牀。執板歌一聲。賓主無留觴。
嗽井消午醉。掃花坐晚涼。主翁塵外人。三十辭明光。
閉門自灌園。種花見老蒼。有才不試事。歸卧野僧房。
知君非徒然。顧我不能量。始知同一國。喧靜自相忘。
衆綠結夏帷。老紅駐春粧。何惜君馬蹄。坐風風雨狂。

秋日獨酌懷榮子篋

新秋一盃酒風雨早涼天眷言西隣友咫尺莫能前
豈無病羸馬泥滑不勝鞭端居何為者落莫掩書眠
高柳颯已踈碧草留餘鮮衰懷感徂節客舍悲流年
孤吟誰與和獨酌還醒然新晴野路乾期子南山邊

秋雨小酌贈賈七

出門秋雨泥漫、嗟哉后土何時乾官曹事休歸舍
卧破屋淅、西風寒弱妻傾榼勸我起稚子笑語爭
杯盤我生樂事但如此為爾一醉愁腸寬仕塗翩、
鬪巧捷華裾鮮轍相追攀老來百事覺羞恥懶伴兒
女塗鈿丹賈郎豪華獨異我粉腮玉指雙鴉鬟清眸

侑酒醉百醜肯咀貧甕寒釐酸堂前菊花日以好落
砌槭、梧桐殘當謀痛飲待九日豪氣一壓龍山栢

今日

今日寒氣至晨坐進一杯一杯未能已三酌竟空壘
我有肯臆事欲言誰使陪徃、中夜歎鬱結無由開
賴此尊中君破悶有從來時、從之游報我以歡咄
古國多寒看老妻治炮煨誰云一日富此價萬瓊瑰

止酒贈郡守楊懷寶

止酒正似塞决河厚積薪芻傳沙礫堅牢不使見蟻
漏一線才通便奔激莫輕弱箭不穿縞轉眼已驚牛

齊東野語
弩射我今止酒用此法目前逾月無涓滴情鍾我輩
當痛制慧通則流那可測懲羹端是合吹壘用玉無
疑初諫漆脾乾胃燥生未省黃媯無聊怨岑寂不憂
羣飲惱姬翁但畏獨醒嘲楚客茫然自憫還自笑一
身心口相仇敵何妨二豎即奔忙不廢三嬰更滋澤
平生杯杓不掛眼一飲便須論斗石低心伏老慎勿
癡此身何啻千金直

謫官黃州至南頓驛同李從聖叔侄草：小
飲

共飯何草：客來從遠道傾壺得殘酒聊以開懷抱
年將半百兩鬢華謫官憔悴來天涯神理可憑我道
在不應長遣路人嗟

嘲潘即飲

老人夜短睡不足勃公窓外彊知時五更未明語千
萬更憎林間鷓鴣兒吹紅洗白雨三日吾園花在已
離披一年春事坐如此白首窮頓歸無期念此徑須
沽酒飲買魚烹肉勸妻兒更呼東鄰好酒伴為我醉
倒堦前泥

十三夜風雨作暑氣頓盡明日與晁即小飲
雨洗風掃除老火不復燎尋收行正令一夕清八表

衰骸因燒煮魂魄始可召東窓美一睡燈火清自照
銀河西南注促織近堂與歲晚我何為三觴醉清曉

四月一日同潘何小酌

今晨一杯酒相屬送歸春明年東風至何處復迎新
懸知柯山下猶作未知人來事如宵夢未至難預論
且復飲此酒陶然付大鈞

二十三日晨欲飲求酒無所得戲作

張君所欲一壺酒百計經營卒無有夜來客至餅已
空晨起欲飲還戒口努力忍窮甘寂淡人間萬事如
反手百壺一醉有底難造物譎戲君須受

秋雨獨酌三首

秋陰不可解澍雨忽連朝貧居庭除狹漲潦時驚飄
老夫凌晨起山木鳴蕭蕭開門買野菜菘薤喜新苗
鄙人晚耽佛像設如僧寮焚香翻貝葉禪誦安不勞
日高出道場傾蓋盈山顛醺然知體暢誰共此逍遙

又

羲和隔重雲不復知下土商羊何為者得時方鼓舞
老人閑不出秋草生環堵况茲陰霖時塊坐誰與語
江人雨不漁魴鯉不登俎晨烹亦何有藜藿恣烹煮
壺中有芳春造物不得與一醉興未終連延忽三舉

又

陰雨何可處樂事賴尊中泥濘不可出紫掃一畝宮
氣平憂患失目淨塵滓空誰知環堵間樂事殊未窮
老人飽諳事未易勤其宵兒曹方蝸蟾幾見弄伎工
惟有尊中物于人差有功不解作悲秋吾師柴翁

三月十三日本約潘郎同游安園以雨不果

因飲于家為說宛丘木芍藥之盛作此篇

衝泥看花亦不惡泥深三尺馬苦矐閉門且復與君
飲吟詩寫字樂有餘姚黃一枝說不盡天姬帝子非
世姝念君東坡守寂寞春深窮巷堆枯榆

孫志康許為南釀前日已聞糴米欣然作詩
以問之

平生一尊酒風月不可無謫官將十年一醉未易圖
市豈無旗亭官亦有酒壚薄苦與釀酸一滴不可沽
英、孫夫子臭味真吾徒自云得異蘖乃出粳稻腴
歲久精粹去、者乃其粗醞釀才決日芳甘已盈壺
僖人喻其力若火經茅蘆此語真野陋殆出負販夫
前日開吉語糴便已在途每恨陳乏糲價直如買珠
憐君久客囊傾倒無復餘假器走僕僮供我一笑娛
欲為澆巾潛請學滌器如作詩以訊之何日陳尊盃

王晉卿惠詩許酒未送次其韻督之

酸寒杜陵老痛飲遺身世雲安小縣麴米春遙知美味無多子猶令此老氣如虎傲兀幾以醉為累爭如侯家美酒如江湖金鑄犀杓與之俱玉壺滿傾春水快銀槽夜滴秋雨踈主人文章足賓客許致麴生來坐側三杯脫帽我家風渴如旱田占雨虹冷官如餅君未見腹惟貯水冰生面鳴鞭走送煩騶轡坐對朝雲北風起未欲煩公大作宴老夫自斟看深淺

潘郎以予生日見過致酒出兩詩

東風沛甘雨百物一時好江邊桃李盡紅紫到百草

道傍負檐子寒食歸祭禱念我淮上丘三年不供掃

又

淮陽牡丹窟盛不數伊洛姚黃一枝開衆艷氣如爍亭、風塵表獨立朝萬萼誰知臨老眼更復美葵藿暮春奉女兄弟集宴堂

晨暉麗花柳流水灑池塘暮春漸暄燠華構肅朝涼使君簿領暇亦復陳壺觴班坐豈異人骨肉皆歡康遙山出遠翠遠水明斜陽歡言不期醉淡泊味何長乞錢穆父給事丈新賜龍團

閩侯貢璧琢蒼玉中有掉尾寒潭龍驚山作春山不

張氏文集
覺走馬獻入明光宮瑤池侍臣最先賜惠山乳泉新
破封可得作詩鼎孟簡不須載酒過揚雄

宛丘先生文集卷第十四

宛丘先生文集卷第十五

張耒文潛

古詩

春日雜書八首

長安春雪消天地一清潤
牆東風霜斫新葉如奮迅
老懷輕歲月榮謝置不問
平生兒女心乘間亦闖進
微芳觸鼻界春意滿方寸
却嫌一餅鉢事與花不韻

又

出門逢一士韋布汗塵土
延之升賓塔再拜色低沮
問來何所欲涕下說貧窶
其求升斗爾我亦不能具

我窮與君等祿不飽兒女一事聊自賢無求差勝汝

又

年長心益衰讀書常苦忘當其欲談說散墜挽不上
詩書非真學盡記未足尚但憎心辜眼不為謹守藏
書多墨入腹無乃與飯妨何如粲然白廣作酒肉益

又

春風無行迹貧舍亦時至欲將桃李蹊易此冰霜地
朝陽屋角暖岸憤散衿袂跡來飭妻子裘纈且飲費
那知事大謬暮雪卷風至單衣不得出宛轉眠破被
亦知事不久頃刻度匪易四鄰同一歡初不辦此計

天公擅萬物與奪得自恣如何倒寒燠乃以命為戲

又

浮名一蹭蹬萬事付莽鹵唯餘田園心尚欲學老圃
空庭春雪盡平地灌膏乳買花門前翁栽插築可教
種之未決日晝夜風卷土真須學抱甕敢信春必雨
隔牆見蒸藿氣欲陵棟宇彼獨誰使之時來遽如許

又

謂春真無情乃發桃與李若真有知者風惡折蘭芷
是非一無與任物自生死德之固已愚怨者亦豈理
有圃畏不蕃有田憂不美吾環堵蕭然於何生愠喜

又

昨日為雨備，今晨天乃風。障風謹自保，通夕雪迷空。
備一常失計，盡備力不供。因之置不為，拱手受禍凶。
當為不可壞，任彼萬變攻。築室如金石，何勞計春冬。
此道簡且安，古來家國同。

吾聞古夸父，逐日沉虞淵。以日為可逐，智固未足言。
徒能出八極，撐突干雲天。當其僨且斃，更使兒女憐。
至弱敗至剛，水波乃飄山。誰能守此道，却敵以空拳。

春日雜詩六首

啼鳥喚我覺，簷日行且午。繫_一出葉樓庭，雀鳴欲乳。

妻兒病酒睡，雞犬樂其侶。風光不我違，捨醉何有度。

又

東風入我園，花落如急霰。感之復携酒，撫樹為三歎。
離_一：牆間草滿地，不可踐。陰陽本無情，榮謝欲誰怨。

又

春晏百草秀，野花無復名。悲哉桃李闌，念此聊接英。
翩_一：雙飛蝶，天靜午日晴。悲憂浪自若，有酒但知傾。

又

堂南老榆葉，清蔭漸交映。飄_一：風花乾握_一；雨葉盛
鳥鳴日方遲，客去門愈靜。自無濟世畧，耿_一：欲誰省。

又

三月行復至青春坐侵尋飛花去寂：新葉來駸：
白日照芳草荒園亂鳴禽朱顏任自老安事累吾心

又

東風忽無情吹我園中花繁紅與艷紫零落委泥沙
鳴鳥亦何事啾：竟喧嘩須知盛已極委棄欲誰嗟

春日雜興

桃李用事辰鮮明奪雲綺繁華一朝去默：慙杞梓
時徂鷹化鳩地遷橘為枳獨有羨門生後天猶不死

又

昔我游京室交通五陵間主客各英妙袍馬相追攀
千金具飲啜市金雇吹彈纓弁羅廣席當頭舞交竿
鮮粧耀漆酒錦額生風灑燈燭暗夜艾士女紛相班
歡娛易徂歇轉盼如飛翰疊：負孤願離：街永歡
山鳥窺茗飲簷花笑蔬飧棄捐勿重陳事定須蓋棺

又

客從遠方來遺我昭華管吹之幻人心異境生虛窅
礮：青嶂橫決：春流滿馬蹄交狹斜車轂錯平坦
士女競芳辰禽魚蔭脩竿依微認涕笑凌沉見纖短
停吹歛泯滅耽：復空館靈物信所真顧恨知音罕

又

潭：故邑并猗：上官蘭不食自清潔莫服更幽間
志士恥弱植卷迹甘飢寒佳辰邈良覲觸物懸悲端
入途眇回遠經歲曠音翰豈不慕裘馬詭得非所安
蟬冕多怵迫繩樞渺憂患枉尋竟何補方枘誠獨難

感春十二首

春郊草木明秀色如可攬雨餘塵埃少信馬不知遠
黃亂高柳輕綠鋪新麥短南山逼人來漲洛清漫：
人家寒食近桃李暖將綻年豐婦子樂日出牛羊散
携酒莫辭頻東風花欲爛

寒池冬不流落葉塞泉罅東風日夜來春色到山舍
杖藜遶東溪流水平可架疊石引之來潺湲：到深夜
平瀾朝可鑑倒影見亭榭清風起修篁翠鳥亦來下
天和人意舒春暖景物姤歌此濯纓詩塵埃欲高謝

又

致酒傍修竹：風吹我衣臨觴曷不樂感此盛與衰
昔我池邊柳北風無完枝春芽忽可擷弱：不自持
榮枯兩相召念此能幾時要終必復始惜我芳華姿
自古無如何悲歌欲何為聊進杯中物日醉以為期

又

南山如佳人秀色慰我思微風從東來清洛搖春漪
驅馬出門去悠悠踏長堤暖日麗花草微雲渡南溪
高丘者誰子斷裂岡前碑當年豈不偉泯泯今誰知
老翁驅牛耕墳草半已犁功名但若此達士觀如遺
飲酒復飲酒勸君無復辭人生百無益惟有飲庶幾

又

長嘯視天壤手撫白玉琴一撫再三歎誰哉知我音
翩跹娼俗子一仰復一沉靈鳳翔九霄不願蒿下禽
擇食無果腹貪藏有良金豈無得與失兩各行其心
窮通亦有命榮辱迭相尋躬耕倘未輟聊為梁父吟

又

今晨起何早盥漱坐南軒啄木響高柳春渠鳴亂泉
悠然此時心默然誰與言焚香閱素書濯手開靈篇
神爽道自合體和真亦全蕭蕭毛髮輕浩氣驅昏煩
呼童策藜杖躡露開中園擷彼杞與菊歸烹助盤餐
既飽誰與樂登高望南山還歸酌美酒興罷復陶然

又

夜醉朝未醒披衣步南堂折彼曉樹花嗅此凝露香
好鳥鳴我林聲如韻風篁娟娟屋東杏願我如窺墻
物色豈不好人情獨何傷思我二三子各限天一方

引
無鬢不可游無羽不可翔
耿：千里心箕昴互相望
結交古所重義合不能忘
離別可奈何還歸舉余觴

又

浮雲起南山冉：朝復雨蒼鳩
鳴竹間兩：自相語
老農城中歸沽酒飲其婦
共言今年麥新綠已映土
去冬一尺雪新澤至已屢
豐年坐可待春服行欲補
嗟余尉窮縣端坐百無慮
幸茲歲豐穰庶息塵埃步
乘閑策羸馬莽：出門去
田原亦可悅農事藹方布
還家有詩書客至具雞黍
勿復嘆遠游人生孰非寓

又

漫：東風來吹此庭前櫻纍
：綴葩萼華采日鮮明
朝陽助輝燦好鳥亦和鳴
起行不自得節物傷我情
皇天分四時寒暑無暫停
悠然一氣耳不與人事爭
方春感芬粵秋復惜其零
一年能幾何方寸不暫平
念此自知妄放歌遂遺形
達人傲天壤兒女徒吟嚶

又

仲春漸燠沐攄散常遠步
獨穿林下蹊斜轉竹間嶼
鳴泉競漱石迸笋或妨路
吹衣信和風濯足解雙屨
深行意益愜默坐憇亦屢
野花迎客來啼鳥驚我去
羣鳴投樹鴉獨下過溪鷺
晴霞送斜日歷：星已布

娟：新月彎稍：山已暮用此遣朝昏誰謂非尸素

又

高臺面南山獨立望空濶東風悠然來吹我鬢中髮
獨游動遠思覽物念所悅伊人在千里山水不可越
玉音坐契濶容華有消歇悲哉音莫致雜佩空自結
羣飛雲間鴻北羽儼成列愛日崇令德嘉好當無絕

又

沉陰涉春仲積潦斷行蹟浮雲起南山商羊未休息
壅澗無宿滯芬芳有新摘燈明林間鷺鳥靜山靄夕
濁醪足斟酌野祀柔可食瑤簪脫羅篔玉縷刺肥鄉

冥懷默有契玩理方自得庶幾達人風持用慰寂默

感春六首

我昨西來到昌谷主人致酒留我宿坐中少年美如
玉高歌清燿春夜但還家病酒對殘春東風落花吹
滿屋出無與語歸閉門安得萬里馳吾足

我昔東行花始開我自東歸花半摧萬紅辭林捲風
去坐見錦繡蒙蒼苔南山朝雲鳩逐婦日暮微雨蕭
蕭來一春晴明苦難得掩蔽風日知誰哉

悠：朝興暮還息官閑事少門無客空山多陰春足
雨飢馬蕭：空伏櫪文章工巧謀愈踈顏鬢衰遲進

無策繫身五斗爾自為何用中宵空歎息
亦知春歸不可留有情未忘寧免愁平田
菘：芳草合清洛不斷波悠：傷心千里寄
雙淚催老此生初白頭問舍求田未成計
青衫手板對人羞山民為生最易足一身
生計資山木負薪入市得百錢歸守妻兒
烹斗粟山林未盡終不憂衣食自樂他無
欲人生誰使愛功名萬慮千思撓心腹
騎馬出門暮復歸出無所詣歸對誰妻兒
具酒勸我飲兒稚笑語傍嬉：人生如此亦
可樂安用軒冕生光輝九原可作欲誰與
鹿門龐叟真吾師

又六首

淹留生白髮默：又驚春花房與柳萼三
見東風新竟日雨不止修：寒着人擁裘
坐閉閣但與山爐親昔我東南交藹：賢
簪紳朝晡不相捨談笑夜達晨清言間嘲
謔侑以肴與尊風花春院靜霰雪夜爐溫
南士多文章最愛蔡與秦蔡彥規秦太虛吳僧參寥者參寥法名
道潛蕭洒出埃塵詩多山水情野鶴唳秋
旻江子貧而廉卿黨稱其仁江瞻道徐子節
最苦徐仲車五十慕其親頗有豪俠風時：見
于文相逢必痛飲大酸若鯨吞家無一金資
有口不言貧楚望來自南周楚贈我佳

句頻送我歌百言爛如張錦首蔡子不可見窮泉悶
幽魂遺書誰收拾撫舊心空存僧寥安在哉江漢一
孤鱗徐子益寥落寂無人薦論周子有書來乃在吳
江濱其餘數子者影嚮無由聞寥：青天高落：參
與辰東西不相及難合易離分自我官窮山耳目如
辭昏相逢半俗物彊笑接歡忻景物豈不嘉招携阻
佳賓端如守籠鶴終日掩吾門春風動花光桃李日
繽紛長歌寫我思書寄東飛雲

若：堂北桃昨日花猶小暖風遲景一日功萬夢千
葩爛相照東風漾：吹朝雨朝日滿簷春鳥語櫻桃

得煖花意忙接萼聯枝鬪先吐蘭芽出地長可握小
筍如簪堪薦筍欣：萬木誰使然時來不肯居塵土
盛衰相感但如此鏡中安得朱顏駐古來百計無可
禁惟有飲者謀猶庶乃知甚急莫如酒有衣可典猶
為富我今不樂欲何待薄俸自給供朝暮功名有命
不可求白髮無私誰得拒從今酩酊勿復辭棄置人
間千萬慮

我愛沙邊雙白鷗飛鳴相樂還相求往來飲啄性如
一異類不至心無憂我來窮山無與友雖有接納非
吾儔人生從類乃為樂彊顏笑語懽何由

東風吹桃李花落已滿地搖：新柳枝薄陰才可花
誰云同一時榮謝而異意由來何足較要之歸一致

又

默坐不復出浮雲作朝陰離：簷間花隨雨下故林
物色一如此光顏坐雕侵自歌陽春曲吾不待知音

又

午日步西園繁花亂相照妖：海棠枝顧我如欲笑
殷紅點輕素含吐皆窈窕持贈東鄰子願言論久要

春陰

春山苦多昏陰靄晝常暝鳥鳴欲成巢冰泮魚已泳

薄寒方未已慘切有餘勁霏：晚雨飄黯：夕氣凝
高鴻戢南翮布穀謹新令班：農在耕冉：麥將盛
官閑倦無侶覽物偶乘興無辭數携酒溪柳黃欲映

長安仲春二首

長安仲春七日風蒼茫頓撼天地同應門縹闕岌欲
動况我窮巷連蒿蓬暮寒卷雪連草：平明萬屋青
成編無言桃李終默：得勢泥塗常浩：夕暉入屋
人氣活勞苦義和間何濶斗杓東指令未行要使燭
龍聊潑刺

長安花繁仲春月北風倒山雨成雪窮簷下里袴襦

盡老翁稚兒骨欲折老人諳事不復驚以手扣額願
天晴夕陽才升已復晦積雲如山那肯退

春日

堂：春日躍山出郊原草木皆清新千紅萬紫各有
態正自鬪羣勞精神短籬誰家小桃李雖復幽陋亦
可人但知痛飲莫辭病數年幽憂難具陳

寺晚

春寒掩古寺遲日轉修廊古殿流塵暗空庭碧草芳
中有措筇者非醉亦非狂謫官滄江上已換一炎涼
春來不出門蔬飯守禪堂不知門外花風雨知在亡

興來時展卷睡足自焚香清吟當旨酒踈懶味何長
余方止酒

辛未立春

彩勝耀朝日歡言立新春朝陽披宿靄頗覺天地溫
蔬盤簇細甲相勸御芳辛誰去冰霜底微綠還陳根
我居雙老槐對聳蒼龍鱗歲窮益慘淡何以慰老人

三更

三更月暈合定知明日雨開門已蕭颯寒氣侵庭宇
東風變淒凜閉戶思室處賴茲樽有酒細酌供燕語
斗杓行指卯雖寒能幾許惟應園林好新霽千花吐

仲車元夜戲述

華燈耀廣陌皎月臨重城唯我二三子柴門通夜扃
展書對明燭濁酒徐：傾崢嶸千萬慮一醉皆能平

正月二日探春

青春來幾時臘雪消未已蒼茫陳根中新綠已映趾
高風變冰霜和氣從此始青芒綴蒲柳紅粒粒桃李
融泥發新陽暖日動生意經年不窺圃偶此携婦子
提筐擷野甲若：寒蔬美新年酌尊酒佳節聊燕喜
優游自有趣朝市苦多事閑暇不易求寧須歎留滯

歲後三日

春風攪空如怒濤春日寂：在蓬蒿衡門鳥雀寂不
下西園桃李氣已嬌天邊碧雲空漠：門外芳草
迢：人生幾何春復夏可但白首隨魚樵

正月八日坐局沽酒

為門里間何蹀躞上元楚俗習張燈新春此時最佳
處獨我坐曹如定僧霜林夢澤蒼茫野烟草江邊寂
寞城小飲未能來喚藁雙眸終日冷如水

新正

新正閱月天苦陰白日未照草木心黃州城中人跡
少江洶湧兮山崎嶇柯山老人盡日閑煖依薪炭不

出山蘭風伏雨莫收拾不念厚土何時乾

春風

春風浩：春陽晝老木生芽綠如豆占巢老鳥聲鴉
鴉南陂雨乾麥將秀人家寒食無一月青筠蒸魚競
時節白衫紫領來自田縣官呼我要青錢

苦寒二首

二月八日寒未已山城雨過淨如洗城門樵渙不復
來市中屢齒響長街老翁一杯百不知酒酣放歌視
羣兒芒勾當權不用事玄冥功成徒爾為

山城薪炭賤于土老翁守壚朝復暮時傾墻下一杯
酒不怕簷前三尺雨共言麥好歲常熟里巷往來聞
好語老夫湯餅百不憂折脚鐺中足烹煮

正月望日示童子

呼童致明燭展我窓前書顧謂爾童子此豈不足歟
得真自忘偽觀一知其餘爾觀千萬燈豈與一燭殊
爾豈不欲醉舉杯傾我壺爾豈不欲飽構火烹我魚
人生貪外物要以樂其軀吾求曷不足安用勞馳驅

端居二首

舍東日初上堂南雪已消鳥聲弄新霽春風動柳條
學道心未降端居生寂寥佳人不可挹芳物為無聊

夕扉還自掩彎月已翹：黯：長安夜愁思悵迢：

又

餘寒羞老木慘淡氣未平王國富車馬士女競新正
風埃息九陌紈綺艷重城燈稀夕烟重斗轉夜寒生
倚檻復何待依：空復情

寒食

風雲雖不定日雨亦易乾殘春猶凜：助我朝食寒
想見芳野田士女游班：去者日以踈更為來者歡
青紅間車馬日暮醉墻間

麗春

蓬蒿眼已熟收拾到阿麗徒分色黃白未害格妾婢
爭妍知不足出刺以自衛上有寒梅枝春霜一樵碎

春林

春林露如雨肅：曉花寒引手攀高紅微香來鼻端
何以比芳潔置之青玉盤持歸供像佛相對淡無言

上元日早起贈同游者

夜來人散殘更月曉陌空存舊車轍彩燈城市已春
風寒木人家猶臘雪疆起相逢酒未醒殘膏宿火尚
熒：歸來更拂障泥錦重約黃昏信馬行

宛丘先生文集卷第十五

Blank page with vertical lines.

宛丘先生文集卷第十六

張耒 文潛

古詩

初夏

南風吹筍成脩竹園林一番新陰綠
足愁多病少懽娛感時念遠傷幽獨
遙山林外知何處倦客樓頭空極目
悲笳三疊閉江城娟娟新月啼烏宿

仲夏日

雲間趙盾益可畏淵底武侯方熟眠
若無一雨為施澤直恐三伏便欲然
算商沽酒有底急束帶坐曹真

欲顛平生不辭作熱客且復飽食窺陳編

次韻魯直夏日齋中

文章慙翫散談舌罷雋永年來屏百事但願兩耳靜
黃公安禪室不覺在市井客來飽清風可是徒造請
犧尊與鄠杜妄計幸不幸願君妙觀察金門等雲嶺

納涼

靡：春事退寂：夏日長日西騎馬歸卧此北户涼
官事幸休逸甘為白頭郎朝出暮還家悠：愧路傍
所欣藥物靈頗覺疾病康幸免三已愠敢希五饋漿
難堪七有餘不過三已嘗呼兒且糲食貧固士之常

入伏後三日

老火熾而焰端能流弱金清秋有微警西風生薄陰
日中無停暉俛仰忽已沉齊紈不足玩流景逝駸：
盛衰寧獨行中具密相尋蓬茅有佳處亦足慰人心

畏暑不出

赫：三萬里共煮一鼎湯蓬茅數椽屋何處有清涼
惟有攝心坐憇此真道場清虛無一物焚灼不能傷
自我知此趣兩脚不下堂人皆笑我拙我亦笑人狂
四月之初風雨淒冷如窮秋兀坐不下堂二

首

東君已成歸風雨為之殿夜來柯山溜淥射交百箭
可憐東園花收拾無一片開門不能出逕滑那得踐
還歸酌卯酒佐酌有蒸菹重思理貂裘未用求紈扇

又

風雨四月初正作窮秋寒未明方更候陰沴時相干
陰陽天自便寒暑無必然玄冥與祝融政事誰得專
江鄉累歲飢一飽望今年不知誰不仁探喉奪其食
柯山窮老人方暑愁衣單似聞林笋生蠹：戈戟攢
但知飲美酒折取供朝盤

夏至

長養功已極大運忽云遷人間漫未知微陰生九泉
殺生忽更柄寒暑將成年崔嵬干雲樹安得保芳鮮
幾微物所忽漸進理必然豈哉觀化子默坐付忘言
暑毒不可過又每為賓客見擾午寢不安奉

懷卯老之無事也

桃李成塵鶯未老梧桐未落蛩已多杜門高卧作閑
計挾策讀書如懶何頗遭襜襜驚午夢正坐熟行官
不呵柯山大隱羲皇上清風一榻無經過

夏夜二首

一兩洗空曠肅然天地秋陰陽有至信殘暑逝不留

中夜事忽變西風延葶收雲雷西北來瀛漫布九州
萬生息惔焚我疾亦已瘳起哦不待曉暗步禪堂幽
落月傾屋西候虫鳴不休坐令百感集歲晏此淹留

又

受暑若坐釜付之無如何豈陰陽知爭變起一刹那
西風卷屋茅澍雨如江河振衣欲露坐濯此寒滂沱
烹魚曉沽酒醉卧仰屋歌歲月不待人吾年已蹉跎

薰風二首

薰風動嘉樹日夕成清陰上有枝間鳥知時為好音
陽春事已往桃李不可尋賴茲長養功嘉實薦中林

庭虛納涼吹雲表見遙岑我歌虞氏詩諧此風中琴

又

雨霽衆山秀孤雲散奇姿念知朱明始愛此午景遲
居閑敢自逸隱几玩文詞蕭々林風來亂我書與詩
身僻幸無患官閑詎辭卑逍遙漉酒翁千載與為期

六月五日苦暑

朱夏忽云季金流火方燃遲々朱輪出濯々高雲鮮
困翮守茂樾游魚伏深泉炎々萬物息聒耳惟鳴蟬
白羽誠么麼為功諒徒然那能解煩促揮肘增勞煩
大鈞播一氣寒暑遞徂遷欲逃既無所聊此北窓眠

六月八日苦暑二首

微飈不振髮皎日沸重淵萬木奪華采祝融方燎原
青山瘁無姿流泉不復寒眷彼道路子念茲農畝勤
荷鋤詎敢後擔囊無息肩亦知若可畏謀食敢違安
三伏方肇序金融未能完聊安環堵居酌彼溪中泉

又

羲和午停車草木靜若萎我居倦煩促誰與開我懷
出井泉失冷迎涼幌空開翻：枚林羽飢渴復誰哀
仁哉林間風為我時一來惜哉為功薄隆赫安能迴
觀濤感巨壑清嘯想高臺徘徊滯心賞張望意悠哉

夏日雜感四首

我前十日至柳葉不蔽日我後十日來芳條如紺室
枝間有好鳥鳴和若琴瑟渠：哺其雛啄我中園實
稍：笋成竹濯：草過尺心驚歲已半念此日月疾
朝來數葉墜盛夏有萎色悲哉一陰生長養從此極

又

士而懷其居孔子亦云非賢臣事晉侯夜載使逃齊
醜毒比宴安君子不可懷樂小必害大安近遠之迷
野芻養騏驥 和鸞馳一飽願即止幾何非犬雞
意有在汲：不敢遲安能守槽樞長伴兒曹嬉

又

羣動人夜息我歸亦安眠脫我身上衣援枕體晏然
朝日常營：有生不可閑義和哉其光幸此須臾間
人生一世中大小無百年胡為不自暇長抱勤苦歎
才者勇設施誕者夸死權彼有驅其心欲休諒無緣
我本與世疎少慵老成頑何為不引去坎軻行所艱

又

娟：簷前月雖缺自媚好團：理絲虫養身恃其巧
無能老蝙蝠乘夜出堂與那能捕飛蚊未解聒耳鬧
悲歌草間蚓辛苦自鳴噪爾生可以默何所欲而噪

鳴蛙訴其渴謂若天可禱瘖蟬死不鳴豈以訴無效
悠：羣動情誰得辨醜好我歌豈徒然亦用自警告

宛丘先生文集卷第十六

宛丘先生文集卷第十七

張耒文潛

古詩

感秋呈宏父兼呈周楚三首

西風吹我舟繫纜岸邊柳蕭蕭落船葉日夕煩我帚
心驚芳歲晚日月去如走搔吾鬢間髮少壯寧復久
平生拙謀身辛苦為五斗苟逃飢寒憂不敢擇所受
心因摧折低面苦塵埃垢蹶警前勇俛蹈新操
功名委之命寧足計薄厚獨携古人書千古自獻侑
我烹亦有魚我酌亦有酒非求與俗違聊以安吾守

又

西風中夜來飛雨隨以至攬衣不能眠起坐為涕泗
炎蒸雖云酷香草猶可佩清商來無情凋我蘭與蕙
吟：草虫悲憂：露蟬嘒高粱燕如客鍛翮鷹方鷲
乾坤本無心萬物隨一氣如何于其間感愴坐自累
置之勿復道得酒但知醉

陶然杯酌間瀟洒無餘事浮雲無停陰急雨來清秋
颯：水上風吹我千里舟二年客淮楚乞米充飢喉
空堂堆詩書冷落妻子羞操舟今何之漫浪為西游
豈不厭奔走負賤無良謀人生天地間如萍水中浮
安得必所往南北但隨流達者知其然委已任去留
止若寄渚雁行如浮海桴萬物本無事百年漫多憂
冥懷付造物俯仰余何求

秋興三首

八月禾黍熟登高望川原山河豁清霽風日開明鮮
晴光散草木餘爽厲淵泉飄：孤飛鷗擊搏無留拳
幽獨感搖落端居驚歲年誰為知心者賴有濁醪賢

又

秋日照荆榛空山莽蕭索人稀雞犬閑古道轉城脚
旗亭數家市炊煙起籬落牛羊暮求羣歸鳥紛落泊

菅麻已在漚黍稷行可獲歲豐農功勤膏火通夜作
嗟余何為者愧與衆同樂南畝亦易謀咄嗟吾力薄

又

寒日在東屋鄰家晚雞啼闌斑黃葉地白日虫鳴悲
揚：舊香草白露彫華姿雖悲就搖落所喜實離：
幽雅叙衣食備寒戒先期薪芻既收飲酒醴亦時施
嗟我無一塵薄游倦東西倦言及農畝歲晚空嗟咨

搖落

搖落已可悲况復值秋晏山深雲物陰所向皆慘淡
踈枝綴陳葉風至時一散壞壁畫蛩啼衰草飛蟲戀

嗟予守窮谷秋物已三見胡為久淹留不自厭貧賤
由來人間事利害喜相半優游歸隱約富貴足憂患
安行吾不迷夷路坦可踐保此頑鈍姿悠哉復誰怨

九月一日有作

况：日光薄蕭：風葉吟今辰九月朔秋物半侵尋
賴有堂下菊芬芳散浮金感茲搖落際採擷慰孤斟
木落見南山池清照踈林翩：短羽健香：潛鱗深
落漠若無趣屢空阻抽簪晴明躡吾屐晚歲多重陰
三伏暑甚七月八日立秋是日風作涼爽炎
酷頓消老病欣然命酒成二詩

西風吹淡白，窗戶含凄清。炎涼一朝變，徂暑逝不停。
山堂曉瀟洒，病叟巾褐輕。平時干雲樹，芳葉亦復零。

又

苦熱逢三秋，西風颯然起。金氣入草木，傷夷從此始。
盛極衰從之，循環固其理。老翁復何事，新涼欣酒美。

秋風三首

秋風蕭蕭，洛川渡水碧。沙寒飛白鷺，波頭伐木欲成。
梁落日，蕉蘓下去山。山頭九月雪，一尺山民燃薪當。
襦袴石田收，薄婦子飢歲晚。苦寒安可度。

秋風蕭蕭，吹野桑。田家黍稷初登場，雉肥兔飽鷹隼集。

健水落沙冷，魚龍藏。長淮煙波渺千里，悵望搔首山
川長。二年薇蕨苦不飽，長安裘馬多輝光。

昏鴉歸，栖暮天。迥新月娟，水中影。秋聲索索，起桑
麻。古道入，歸煙火。靜公庭，吏稀霜樹老。藥檻雨多幽
菊盛，山家生事飽。諧知野果村醪，遣朝暝。

秋懷

秋雲晦，清曉密。雨散迴風修，然有嘉思。盥櫛臨青銅，
掃地靜如眼。妙香散浮空，黃葵麗不驕。幽菊靜有容，
無車驚門雀。幽巷連蒿蓬，老知飲無益。靜覺書有功，
晚木多美實。涼風驚候虫，問津竟何效。真愧圃與農。

秋感二首

秋日無遠暉秋草無美姿殘蛩吊白日寒鳥悲空枝
時節一如此余出張安歸疆歌不成音還坐空涕垂
感動百慮進觸心遂紛披棄捐勿復道日莫眠吾惟

又

秋山多遠聲日莫尤百態鳴風落高樹清澗瀉寒瀨
鳴蜩莫誰憐瘖死不償罪蛩啼獨不已有愬未逢解
天時激汝曹寧自知進退吹噓成踴躍芻狗忌徹祭
庭空月霄桂園冷露晨沛嗟哉心難忘俯事還感槩

觀池漲有作

清商初用事力弱殊未完假此通夕雨遂收祝融權
平池舊清淺亦復波浪翻白鷺飛不下高荷沒青圓
是日酒初熟芳香滿金尊三酌徑就醉此懷誰與論

夜初涼

庭木舞風雨清秋來我堂衾裯偃宵寐燈火照新涼
昔我來清潁庭花晚有芳坐看桐葉暗已近菊枝黃
歲月忽流駛形骸變老蒼淹留應有命通塞詎能量
寂歷年華晚優游永日長憂時非我事黃卷有虞唐

秋日晨興寄楚望

夜雨霽清曉浮雲散涼川幽人理青髮汲彼石井泉

引山文集
焚香展素帙持珠諷妙言晨暉淡悠揚秋霞麗紺天
萎花開露餘孤葉零風前感此芳節晚長嘯心悠然
傾觴散滯念殄菊留華年牢落歲暮心非君誰與宣

書初涼夜至將曉靈壽寺作

秋房燈火清人語久已寂城遠不聞更警柝鳴未息
橫參已入地斗柄當天直乃知三更市中塵已寂歷
我時書守几磨墨傾硯滴反覆小學書昏目如芒刺
試尋隣房僧鼻軒背負壁體勞徑就枕冷夢分南北
覺來寺鐘鳴僧禮像前席須臾聞梵唄木魚如叩石
舉頭視東牖朝日已淡白反身起披衣神爽健筋力

亟來酒甕邊側聽聲唧：

秋園雜感

只今枯條冒衰蔓異時密葉如翠葆執斤之子久睥
睨簸米待薪已除竈寄言青雲富貴人金朱能得幾
時好是非榮辱百不知却輸頑鈍柯山老

秋日

墮葉鳥不顧枯莖虫暮吟野荒田已穫江暗夕還陰
夜語聞山雨無眠聽楚碁弊裘還補綻披拂動歸心

西風

西風吹屋絡緯鳴星河錯落已三更軍城傳警萬家

靜山堂含風遙夜清雲收纖月映山盡天轉北斗向
江傾舍南高林栖鶴鷗危枝高巢雛夜驚

七月十日雨炎暑頓解有感

空山風雨夕微雨淒房櫺徂年兆搖落感歎白頭翁
謫居困炊玉無田願年豐欲持一杯酒旁舍慶老農
烈日辭紉扇高林墜晚風清燈夜齋靜不睡獨聞蛩

秋曉

老人不睡秋夜長五更鼓角鳴東堂悲蛩床下欲無
語黃葉瓦溝新有霜雁聲相應江南北斗杓欲下天
中央老人山尊有美酒岸巾先酌一杯嘗

出伏調潘十

伏盡熱隨盡古語當有憑淮南歲苦旱秋暑鬱方蒸
老火熾而焰弱金融未凝火雲大江沸烈日羣山頽
平生白羽扇揮拂何功能蓬頭臥永晝起冠汗沾纓
柯山屢空子貧病復相仍衡茅未可詣作詩問寢興

秋日曬古城

秋日曬古城西風振塵埃出門何所之壞道連蒿萊
飛鳴雞犬稀破屋枯壕隈老圃理蔬畦脫甲瘦未開
輸人暮出城栖鷗一：回悵然心不怡歸坐勸一盃

見黃仲達感秋意作篇

秋風吹衡茅寂歷如荒村獨立無與語悲虫鳴草根
老木經疾風枝葉僅得存疎蔭不滿地白日耿當軒
北城有黃仲眸子清不渾時能出秀句寶鐵雕瓊璫
念將舍我去為吏國西原荒涼古中牟晝夜輪蹄奔
青衫給吏役懷惡未易論彊顏詭應接有抱誰所言
從容未去間無厭走黃昏黃每相訪
常以昏夜

秋懷十首

西風吹前林壯士中夜興感此歲月晚白髮來無情
少年讀詩書意與屈賈爭口談霸王畧銳氣虹霓橫
天衢白日開致主皎丹誠豈懷富貴念但愧稷契朋

栖遲客淮海憂患相纏嬰憔悴消壯氣飢寒費經營
心期與外物易失常難并蕭條為斗粟貧賤洛陽城
我生亦有命榮辱復何驚歲律但驚邁慷慨懷平生
呼兒致濁酒長嘯視青冥醉為梁父吟終誰為聽

又

飄風激浮雲飛雨來若注絺衣逼新涼感此歲云暮
高堂有華簟坐覺顏色故人情隨炎涼興廢一何屢
鮮：中庭菊華葉日敷布可憐搖落中爾獨傲霜露
官閑隨滯念歲晚無歡趣惟與青山期晴明躡芒屨

又

夜靜四聽絕蟋蟀鳴我堂知時爾雖早嘖：竟何傷
西風蕭萬木百物皆摧藏爾豈不自得悲鳴愬中腸
寒衣已在地紈扇委空牀
幽詩嗟婦子入處謹風霜
而我獨何成遠游悲異鄉出處兩無策感時空慨陳

又

歲暮無所為官閑聊飲酒家貧乏有果擷蔬不盈手
要歸一醉爾寧復計薄厚頽然几案間樽散忘宇宙
古來痛飲人可是耽醇酎由来因寂寞聊此娛昏晝
紛：眼前物泯：胷中垢當其暫忘去快若免介冑
蕭：風入簷皎：月當牖歌罷興已闌感歎還搔首

又

蟲鳴一何悲竟夕不能已缺月能幾何光輝還暫爾
青燈照牀帷解帶掩宵寐勞：隨朝日既夕聊此憇
是非競賢否榮辱爭賤貴紛然無停時膏火互煎沸
區：竟何有俯仰終一世癡兒自驕玩達者已高逝
無營謝巧械咋舌笑愚嗜猶須多貯酒遲暮聊卒歲

又

西風掃黃葉零落委我前閉門無來客空牀過午眠
牀頭亦何有狼藉古人編琳琅巧言語照輝後世傳
餘榮更何恃朽骨但茫然悲哉事無益辛苦勞生前

嗟我方病此詩書費雕鐫知愚不自己既痼何由痊
霜梧夜撼：寒菊朝娟：胡為不飲酒戚感愁吾年

又

悠：春與秋泯：朝復夜濟時無遠圖謀食阻高謝
茫：兩不可默：私自咤踈絃無悅音失路有迷駕
孟軻竟迂濶樊子欲耕稼古人不吾待子：欲誰舍
詩書頗完緝官事幸休暇聊從心所樂此外曷足藉

又

原野日遼濶南山竦亭：夏雲歛氛翳秋木呈疎明
幽居若不樂展步乘朝晴嗟我無羽翼何由躡崢嶸

神仙雖誕漫可以忘俗情乘桴古亦有况復凌滄溟
浮生既有限散誕煩冠纓黃精若可採高揖吾其行

又

秋風從西來百草隨委棄如何中庭花粲：耀朝霽
雖懷遲暮感獨秀亦云異炎涼各一時豈必桃李貴
遲功有暮社銳進或先退由來一氣耳瑣屑何足計

又

吏散門寂：虫鳴夜沉：素壁上明月涼風搖樹陰
悲歌忽不愜感歎涕盈衿寫此牢落懷默坐彈鳴琴
俗耳不好古古人已非今悲哉曠四海子：無知音

九月下旬有作二首

今辰九月末秋物能幾許翩：風中葉卷：自飛舞
餘姿不復妍日夜逐塵土寥：空枝高但有寒鳥聚
天時不汝留變化竟誰主今古無奈何悲歌徒自苦

又

慘：歲云暮寒日無停光况復陰晦多景短重雲長
梳頭坐清曉朝飯熟黃梁官閑無事業終日偃空堂
經時不跨馬門徑秋蕪荒惟有霜後山當簾對蒼：

出伏後風雨頓涼有感三首

西風振秋曉萬境一凄清幽草虫響息高葉露華凝

戢翼鳥尚宿引吭雞屢鳴淹留度華歲悵然難為情

又

三伏如湯釜熏煮理亦足西風半夜雨惚户一清肅
那能惜搖落共喜過炎燠老人亦晨起稍進杯中綠

又

殘暑扇中盡新涼枕上歸微雲起平遠空碧上朝曦
稍感夏衣薄漸傷高葉稀來鴻飛集喜卒歲稻梁肥

宛丘先生文集卷第十七

宛丘先生文集卷第十八

張耒文潛

古詩

戊午冬懷五首

悲笳奏已罷落月在西壁卧聞林中鳥先曉鳴嘖
 爾來亦易供固合事安息夜歸陵旦起何爾更勞役
 乾坤擾萬物不使輕有獲無求良獨難何以休吾力
 窓南積雪高三尺二更月出連窓白爐裏石瓶鳴細
 泉燈前病叟措書策家人歲晚貯梨栗倒榼寒醪有
 殘滴三杯取醉萬事平兼味重裘定何益

山陽賢者有徐子親沒十年哀不已精誠動天：為
悲甘露常霑墳樹枝徐子行年過五十衣不被體腸
苦飢天公盍使少富足甘露萬斛真何為虛恩浮惠
天猶爾安得世人無巧偽

楊雄老不過寂寞玩文史側身虎狼間乃卒脫其死
中恬遺外慕獨樂異衆喜但有載酒人何用求知已

又

年來百事懶惟樂靜中趣天寒無來客終日嘗閉戶
進取乏時才窮通有天數委身付造物已矣隨所遇

歲暮歎三首

秋日苦短秋雲多北風蕭蕭：洛水波長林撐空葉餘
柯鳴雁高飛去不息晚花悠：能幾何洛陽經年客
未去歲暮搔首空悲歌

寥：野空禾黍荒北風日夜鳴空桑南山碧天青不
極渺：洛水東流長山空水寒行客少鴻雁飛急天
初霜蕭：窮谷歲已晚嗟我再補冬衣裳

南山蒼：季秋月北風如刀青石裂山陰半夜寒欲
冰晚望高峯看新雪白衫少年臂鷹去暮歸飲酒烹
狐兔強弓一斛尚可彎更欲射獵窮吾年

冬日放言二十一首

清冬萬境肅墻戶益蕭然薄寒唯可飲短景不容眠
貧厨煙火暖塵釜亦烹鮮日復養口腹何勞更問天

又

湯餅慰朝餒三杯澆旦寒醉飽外何欲昏然宵就眠
幽通夢有告默存神自全蕭蕭松竹舍歲暮聊盤桓

又

風雨連江氣十月如深冬坐曹日暮歸密坐温爐紅
慘慘庭下日騷騷意外風三杯容我醉萬事聽天公

又

小兒喜學書滿紙如棲鴉老婦寒不績當戶理琵琶

樽中有神物快寫如流霞三杯任兀兀凍臉生春華

又

卯飲終日醉萬事付悠悠醺然據榻暝簷雨方颺
吾事幸無急不醉欲何求願謂婦與子酒盡為我謀

又

寒羊肉如膏江魚如切玉肥兔與奔鶉日夕懸庖屋
嬉嬉願妻孥滋味嗟可欲謫官但強名比昔何不足

又

酒聖卯時懽此語聞樂天安用苦了了白日供愁煎
浮世本幻妄空花電露然人間無實事惟醉度幾焉

又

愈老愈嗜酒益醉益自然兩人同墜車醉者乃得全
我不但醉酒天和醉心源當其醉甚時更類癡與頑

又

至道與物反夫豈會俗心聖處有困域高鑰一何深
時：資美酒可待及其門送君者既反君鷲胡可尋

又

清晨坐官舍官舍復何有離披經雨菊蕭颯委風柳
飽食或坐睡涉筆無可否油然有好懷日暮歸飲酒

又

日莫歸飲酒兒女戲我前須臾徑三酌掾塌已醺然
老妻坐我傍簡箴屢炮煎大勝劉伶婦區區為酒錢

又

我初謫官時帝問司酒神曰此好飲徒聊給酒養真
去國一千里齊安酒最醇失火而遇雨仰戴天公仁

又

吾腹如鴟夷但滿貯醇酒外圓故不滯中靜一無有
紛々千百輩納若一塵垢下有至真源保之故難朽

又

淮陽名都會葵塏太昊墟最愛西城道汪々數頃湖

古木巢翠鳥清濠見游魚幽居多不愜懷我平生娛

又

靈通古叢林他日休吾車出門循古城荒圃畦寒蔬
手種堂下花顏已數尺餘何時攬其華故人應念余

又

塞向久室處帶幕亦復周溫爐熾新炭永夜炎光流
五更屋霜重重衾如無裘興懷無衣子卒歲聊優游

又

陶潛經世才齟齬不得肆彼寧徒嗜飲有蘊託諸醉
時：吐高詞頗復見一二義熙書甲子此意有涇渭

又

葛公蓋世才功業亦云偶世無左將軍老作躬耕叟
皇天挺奇產必使有所受珠玉在山淵終為王府有

又

秦人焚詩書意欲遂絕滅六經至今存何曾損毫髮
興衰有天理人力自淺拙不憂驪山墓回首遭發掘

又

元子本豪爽頗復有俗氣孟嘉亦可人乃與較權勢
崛強盡百年究竟成何事江左無英雄汝得免徒隸

又

淵明非無心似以酒忘憂如以藥愈疾未佳寧免憂
我直好飲耳與世本悠：人間有何事奚足煩杯甌
晨興苦寒戲潘郎
夜霜漫屋聲折木我乃與君在空谷平生一衲度嚴
冬塊守深爐體生粟大潘借馬貸監河小潘無事仰
屋歌妻兒號寒劇鴈鷺詩書滿腹將如何

十月七日晨起

山鷓鳴曉晴寒日在蓬華老人欣然起構火溫小室
室中空無有掃榻對像佛還觀舊文字塵土暗編帙
一杯徑就醉四體寒若失隔牕即山麓寒木鳴瑟瑟：

江民早累歲流冗東就食秋蝗食陳蔡千里無草色
客來談世事疊：語千百客去深閉門頽然我無責

至日有感

前年至日在何處寒寺蕭：客許昌乞火夜溫行客
酒披裘曉冒五更霜暮投陽翟荒涼驛正見人家燈
燭光飢馬卧嘶毛瑟縮羸童曉對色蒼茫二年旅宦
孤村僻東望歸心洛水長佳節幾逢長索寞我生何
事苦淒涼更無賓客青山滿只有風霜老樹蒼昭代
寧須厭留滯馮公白首任為郎

十月二十二日晚偶作三首

黯、東牖闇寂、吾廬閑粗糲飽婦子首肯無餘盤
雁急天欲雨雞栖夕已寒老人袖手坐一杯聊自寬

又

天寒聊飲酒再酌已停觴豈不欲酣暢要使夜腹康
意得樂有餘偶懽不必長寄身造化中勿使天和傷

又

蓬華無與處北風利戈鋌空爐有微火且復與周旋
酒隱柴桑叟醉吟涓上賢二士忽已遠遺風載陳編

局中負暄讀書

輝、短景留寒光重裘不暖貧負陽老人背溫一體

康我欲持之獻天王天王九重居明光玉几翠被女
侍旁人不知我知謂我在此心耿、不敢忘歲云暮矣
天雨霜且復持此飲一觴

輝、短景留寒光瓦簷霜濕梧桐黃老蛩不知春已
去白晝噴、空啼墻歲行老矣羈客傷塊獨守此天
一方林頭書史談虞唐我言匪髦聰者狂

輝、短景不能春照我貧屋亦復仁虞淵道遠寒雲
屯羲和愁思隕厥輪君不見志士悴憔悴甘賤貧塊處
漏屋含悲辛重堂溫室顛醉昏悠、蒼天彼何人

寒夜擁爐有懷淮上

長安暮冬雪如山堅冰錯落于其間八荒一雲同慘
淡北風怒迴江海翻老人此時不復出閉戶然薪守
蓬華忽憶去年淮上舟有客致酒頗豪逸三更堂下
霜折木坐上美人鳴寶瑟人生有情亦可憐明眸皓
齒如眼前主人金章作塵土烟飛星散江南天知非
遽公時一歎讀書梅叟益蕭然百年萬事費排遣軟
語試問東家禪

和大雪折木

季秋木葉未全落西風卷雲飛雪作崩騰傾倒來不
停頃刻山川失寥廓白頭老翁仰天歎一生未見可

吁愕但悲無食飢凍死何暇更議陰陽錯樵車不來
椽數盡仰徹屋茅烹覓藿坐愁窮臘安可度律管未
改初冬朔我居堂前有大榆百年老榦龍鱗剝夜聲
疑是神物伐參天大枝脆如斲披簷擲瓦事未測起
坐明燈徹其幄命乖久遭窮鬼笑當慮壓覆崩其角
鹿山長官當此時高樓大飲縱歡詭兩邦相鄰無百
里誰謂同時異憂樂尚能悲嗟念窮苦喜君于物心
不薄百里飢寒仰長官勉充此心救民瘼

用歐陽文忠韻雪詩

密雪當殘臘衝風到華門洒窓驚紙濕入竹覺聲繁

天闊飄無界城高積有痕氣和歸麥壠水味入茶軒
廣陌無游騎空郵有滯轅炎爐聊自煖濁酒僅能溫
野迥征鞍設邊寒塞甲屯振奇歌歷：回袖舞蹲：
客坐須馳謁相逢賴酒樽晴明占草木春意到閑園

雪中狂言五首

江鄉密雪常在春異哉今臘已再白風嚴無聲掠樹
過茅簷飛霰鳴策：老農飽食莫畏寒天意在汝田
中麥我雖無田助爾喜來歲不憂湯餅窄

今春齊安大疾疫閭里老弱死藉：篋絕蘆席肩兩
夫繞郭累：瘞千百玄冥一日行正令厲氣入地應

千尺異鄉身健百不憂有錢但知沽酒喫

我家中州食嗜^麪長羅如舩磴如電爛銀白壁照中

厨膳夫調和隨百變江鄉種麥幾數粒強進腥魚蒸

糲飯雪深麥好定豈登明年一飽償吾願

請說吾鄉人種麥漫山亘野頃千百北風寒嚴大澤
乾一臘何嘗見三白春泥冰消土脉動壠畝漸縱牛

羊蹟街頭作餅大如槃一歲衣食事已畢

故園陳堦太昊祠臘雪消後融春泥韭牙苣甲初出
土春槃釘鬪如棼絲里閭經過厭此物糖餹寒具方
交馳江南魚稻豈不美長年謫居長土思

對雪呈仲車

學堂歲暮無來客殘雪漫：風獵：當庭古柳三四
株老翁携帚收殘葉二年閑散百事慵飢寒不自動
鉏鉏囊空餽倒誰復救典衣買酒將空篋人間萬事
苦難齊以醉驅愁最奇捷丈夫未死誰能測幽憂何
自同兒妾飲酣耳熱詩興適直上虛空恣陵躡飢喉
凍噤誰與解正藉醺酣得嚙嚼少年舉白未嘗辭漸
老深杯見還怯何當共有種秫田免向官壚走書帖

雪後贈徐仲車

平明呼童汲井華童歸告我門有雪披衣疾走出戶

看正見風毛萬夫獵冷欺病骨不敢前縮頭蟄戶如
寒鬘樓臺得勢互照映松竹無風自騷屑念昔兒童
逢雪喜搏捧咀吞如沃渴如今欲啗老不禁何異愛
屨而遭刑高門有酒不愛詩我愛吟詩尊屢闕東鄰
徐子與我同愛詩過我衣百結歲頭敗被口吟呵文
似銛金身似鐵人生豈合長賤貧三百青銅直須輟

離泗州冒大雪

陰風駕長淮鐵馬一百萬孤舟犯其壘白羽一揮散
崩騰中夜雪千里照組練乾坤合冥蒙遠色辨波面
雲端數寸塔僅若簪出弁寒飛不遠林瘦植凍依岸

龜山晚沽酒旅食烹野雁惜哉吾里豐一畝不素辦

春雪二首

春雲驕不行凍雨作飛雪夜深歸無燭已覺馬蹄滑
那知事未已通夕注不歇堂寒曉附火簷滴更清絕
前者城東遊桃李繁已發陰陽不可料寒氣晚猶洩

又

青：高坡麥田事日可閱當春望時雨雪盛或為孽
生民常苦勤不敢愛膏血如何待一飽常苦神物奪
茫：元精理未易論本末解裘換斗酒莫畏衣百結
天寒城南寺門外無馬迹東風雪疾消春泥深一尺

豈無老款段畏蹶不敢策還歸見兒女怕冷不下席
楊雄玄未就雙鬢頹已白雖云客載酒此意終岑寂
功成則有命生事亦人力胡為不自勤守此欲何獲
田桑既有裕醪醴亦餘溢嗟哉好事客從古百無一

宛丘先生文集卷第十八

